

D.R. 7/2007

RANG UNDANG-UNDANG
ANTIPEMERDAGANGAN ORANG 2007

SUSUNAN FASAL

BAHAGIAN I

PERMULAAN

Fasal

1. Tajuk ringkas dan permulaan kuat kuasa
2. Tafsiran
3. Ruang lingkup pemakaian
4. Peluasan Akta kepada kesalahan luar wilayah
5. Undang-undang yang terpakai

BAHAGIAN II

MAJLIS BAGI ANTIPEMERDAGANGAN ORANG

6. Majlis bagi Antipemerdagangan Orang
7. Fungsi dan kuasa Majlis
8. Kuasa Menteri untuk memberikan arahan
9. Mesyuarat Majlis
10. Penubuhan Jawatankuasa
11. Setiausaha Majlis dan pegawai-pegawai lain

BAHAGIAN III

KESALAHAN PEMERDAGANGAN ORANG, KEKEBALAN, DSB.

12. Kesalahan pemerdagangan orang
13. Kesalahan pemerdagangan orang dengan cara ancaman, kekerasan, dsb.
14. Kesalahan pemerdagangan kanak-kanak

Rang Undang-Undang

Fasal

15. Kesalahan mendapatkan keuntungan daripada eksploitasi orang yang diperdagangkan
16. Kerelaan orang yang diperdagangkan tidak relevan
17. Kelakuan seksual lampau tidak relevan
18. Dokumen perjalanan atau pengenalan diri fraud
19. Merekrut orang
20. Menyediakan kemudahan bagi membantu pemerdagangan orang
21. Menyediakan perkhidmatan bagi maksud pemerdagangan orang
22. Melindungi orang
23. Obligasi pemunya, operator atau nakhoda pengangkut
24. Peninggalan sengaja untuk memberi maklumat
25. Kekebalan daripada pendakwaan jenayah
26. Perlindungan pemberi maklumat

BAHAGIAN IV

PENGUATKUASAAN

27. Pegawai penguat kuasa
28. Kuasa penyiasatan
29. Kuasa penangkapan
30. Penggeledahan dan penyitaan dengan waran
31. Penggeledahan dan penyitaan tanpa waran
32. Capaian kepada data berkomputer
33. Senarai benda yang disita
34. Kuasa untuk memeriksa orang
35. Kebolehterimaan pernyataan
36. Pelucuthakan pengangkut, harta alih, dsb.
37. Kos memegang pengangkut, harta alih, dsb., yang disita
38. Tiada kos atau ganti rugi yang berbangkit daripada kemasukan, penggeledahan atau penyitaan boleh didapatkan
39. Halangan
40. Pemberian maklumat
41. Pemulaan pendakwaan

Antipemerdagangan Orang

BAHAGIAN V

JAGAAN DAN PERLINDUNGAN ORANG YANG DIPERDAGANGKAN

Fasal

42. Tempat perlindungan
43. Pelantikan Pegawai Pelindung
44. Mengambil orang ke dalam jagaan sementara
45. Orang dalam jagaan sementara yang memerlukan pemeriksaan atau rawatan perubatan
46. Pemeriksaan dan rawatan perubatan
47. Kebenaran untuk dimasukkan ke hospital
48. Kawalan ke atas orang yang dimasukkan ke hospital
49. Langkah yang perlu diambil selepas pemeriksaan atau rawatan perubatan
50. Tiada liabiliti ditanggung kerana memberikan kebenaran
51. Penyiasatan, siasatan dan Perintah Perlindungan
52. Perakaman keterangan orang yang diperdagangkan
53. Permohonan oleh ibu atau bapa, penjaga atau saudara
54. Pelepasan orang yang diperdagangkan
55. Orang yang diperdagangkan yang melarikan diri atau dipindahkan dari tempat perlindungan
56. Kesalahan memindahkan atau membantu orang yang diperdagangkan melarikan diri dari tempat perlindungan
57. Kuasa Menteri untuk memindahkan orang yang diperdagangkan dari satu tempat perlindungan ke tempat perlindungan yang lain

BAHAGIAN VI

PELBAGAI

58. Sekatan ke atas laporan dan penyiaran media
59. Keterangan *agent provocateur* boleh diterima
60. Kebolehterimaan keterangan dokumentar
61. Kebolehterimaan terjemahan dokumen
62. Tanggung rugi
63. Penalti am
64. Kesalahan oleh pertubuhan perbadanan

Rang Undang-Undang

Fasal

65. Kesalahan oleh pekerja atau ejen
66. Peraturan-peraturan
67. Pencegahan anomali

RANG UNDANG-UNDANG

b e r n a m a

Suatu Akta untuk mengadakan peruntukan bagi kesalahan pemerdagangan orang, perlindungan dan bantuan orang yang diperdagangkan, penubuhan Majlis bagi Antipemerdagangan Orang, dan perkara-perkara yang berkaitan dengannya.

DIPERBUAT oleh Parlimen Malaysia seperti yang berikut:

BAHAGIAN I

PERMULAAN

Tajuk ringkas dan permulaan kuat kuasa

1. (1) Akta ini bolehlah dinamakan Akta Antipemerdagangan Orang 2007.

(2) Akta ini mula berkuat kuasa pada tarikh yang ditetapkan oleh Menteri melalui pemberitahuan dalam *Warta*, dan Menteri boleh menetapkan tarikh yang berlainan bagi mula berkuat kuasanya peruntukan yang berlainan Akta ini.

Tafsiran

2. Dalam Akta ini, melainkan jika konteksnya menghendaki makna yang lain —

"Akta ini" termasuklah apa-apa perundangan subsidiari yang dibuat di bawah Akta ini;

"ditetapkan" ertinya ditetapkan oleh Menteri melalui peraturan-peraturan;

Rang Undang-Undang

"dokumen perjalanan atau pengenalan diri fraud" ertinya sesuatu dokumen perjalanan atau pengenalan diri yang —

- (a) telah dibuat, atau diubah dalam bentuk yang material, oleh seseorang selain orang atau agensi yang diberi kuasa yang sah untuk membuat atau mengeluarkan dokumen perjalanan atau pengenalan diri bagi pihak sesebuah negara;
- (b) telah dikeluarkan atau telah diperoleh melalui salah nyataan, rasuah atau dures atau dalam apa-apa cara lain yang menyalahi undang-undang; atau
- (c) sedang digunakan dengan salah oleh seseorang selain pemegang yang sah;

"eksploitasi" termasuklah segala bentuk eksploitasi seks, kerja atau perkhidmatan paksa, perhambaan atau amalan yang menyerupai perhambaan, pengabdian, apa-apa aktiviti yang menyalahi undang-undang atau pemindahan organ manusia;

"kanak-kanak" ertinya seseorang yang di bawah umur lapan belas tahun;

"Mahkamah" ertinya Mahkamah Sesyen;

"Majlis" ertinya Majlis bagi Antipemerdagangan Orang yang ditubuhkan di bawah seksyen 6;

"Menteri" ertinya Menteri yang dipertanggungjawabkan dengan tanggungjawab bagi keselamatan dalam negeri;

"negara penerima" ertinya mana-mana negara yang ke dalamnya orang yang diperdagangkan dibawa sebagai sebahagian daripada perbuatan pemerdagangan orang;

"orang yang diperdagangkan" ertinya mana-mana orang yang menjadi mangsa atau objek perbuatan pemerdagangan orang;

"paksaan" ertinya—

- (a) ancaman kecederaan berat kepada atau sekatan fizikal terhadap mana-mana orang;
- (b) apa-apa skim, rancangan, atau corak yang diniatkan untuk menyebabkan seseorang untuk mempercayai bahawa

Antipemerdagangan Orang

kegagalan untuk menjalankan sesuatu perbuatan akan mengakibatkan kecederaan berat kepada atau sekatan fizikal terhadap mana-mana orang; atau

(c) penyalahgunaan atau ancaman penyalahgunaan proses undang-undang;

"pegawai Agensi Penguatkuasaan Maritim Malaysia" mempunyai erti yang sama yang diberikan kepadanya oleh Akta Agensi Penguatkuasaan Maritim Malaysia 2004 [*Akta 633*];

"pegawai imigresen" mempunyai erti yang sama yang diberikan kepadanya oleh Akta Imigresen 1959/63 [*Akta 155*];

"Pegawai kastam" mempunyai erti yang sama yang diberikan kepadanya oleh Akta Kastam 1967 [*Akta 235*];

"Pegawai Kebajikan Masyarakat" ertinya mana-mana Pegawai Kebajikan Masyarakat kementerian atau jabatan yang bertanggungjawab bagi perkhidmatan kebajikan dan termasuklah mana-mana Pembantu Pegawai Kebajikan Masyarakat;

"Pegawai Pelindung" ertinya mana-mana pegawai yang dilantik di bawah seksyen 43;

"pegawai penguat kuasa" ertinya mana-mana pegawai yang dinyatakan dalam seksyen 27;

"pegawai perubatan" ertinya pengamal perubatan berdaftar dalam perkhidmatan Kerajaan dan termasuklah seseorang pengamal perubatan berdaftar di mana-mana hospital pelatih perubatan sesuatu Universiti;

"pemastautin tetap" mempunyai erti yang sama yang diberikan kepadanya oleh Akta Mahkamah Kehakiman 1964 [*Akta 91*];

"pemerdagangan orang" atau "memperdagangkan orang" ertinya perekrutan, pengangkutan, pemindahan, perlindungan, penyediaan atau penerimaan seseorang bagi maksud eksploitasi;

"pengangkut" ertinya mana-mana kenderaan, vesel, kapal, kapal udara, atau apa-apa cara pengangkutan lain sama ada melalui udara, laut atau darat;

Rang Undang-Undang

"Perintah Perlindungan" ertinya suatu perintah yang dibuat oleh Majistret bagi jagaan dan perlindungan orang yang diperdagangkan di bawah perenggan 51(3)(a);

"premis" ertinya rumah, bangunan, kilang, tanah, tenemen, isemen mana-mana pemegangan, sama ada terbuka atau tertutup, sama ada dibina di dalamnya atau tidak, sama ada awam atau persendirian, dan sama ada disenggarakan atau tidak di bawah pihak berkuasa berkanun dan termasuklah mana-mana kontena.

Ruang lingkup pemakaian

3. Kesalahan di bawah Akta ini terpakai, tidak kira sama ada perbuatan memulakan kesalahan itu berlaku di dalam atau di luar Malaysia, dalam hal keadaan yang berikut—

- (a) jika Malaysia adalah negara penerima atau eksploitasi berlaku di dalam Malaysia; atau
- (b) jika negara penerima adalah negara asing tetapi pemerdagangan orang bermula di dalam Malaysia atau transit di Malaysia.

Peluasan Akta kepada kesalahan luar wilayah

4. Apa-apa kesalahan di bawah Akta ini yang dilakukan—

- (a) di laut lepas dalam mana-mana kapal atau dalam mana-mana kapal udara yang didaftarkan di Malaysia;
- (b) oleh mana-mana warganegara atau pemastautin tetap Malaysia di laut lepas dalam mana-mana kapal atau dalam mana-mana kapal udara; atau
- (c) oleh seseorang warganegara atau seseorang pemastautin tetap di mana-mana tempat di luar kawasan dan melewati Malaysia,

boleh diuruskan seolah-olah telah dilakukan di mana-mana tempat di dalam Malaysia.

Undang-undang yang terpakai

5. (1) Peruntukan Akta ini hendaklah menjadi tambahan kepada, dan tidak mengurangkan, peruntukan mana-mana undang-undang bertulis lain yang berhubungan dengan pemerdagangan orang.

Antipemerdagangan Orang

(2) Sekiranya terdapat apa-apa percanggahan atau ketidakselarasan antara peruntukan Akta ini dengan peruntukan mana-mana undang-undang bertulis lain, peruntukan Akta ini hendaklah terpakai dan peruntukan mana-mana undang-undang bertulis lain yang bercanggah atau tidak selaras itu hendaklah, setakat percanggahan atau ketidakselarasan itu, disifatkan digantikan.

BAHAGIAN II

MAJLIS BAGI ANTIPEMERDAGANGAN ORANG

Majlis bagi Antipemerdagangan Orang

6. (1) Suatu badan yang dikenali sebagai Majlis bagi Antipemerdagangan Orang hendaklah ditubuhkan bagi maksud Akta ini.

(2) Majlis hendaklah terdiri daripada anggota yang berikut—

- (a) Ketua Setiausaha Kementerian yang bertanggungjawab bagi keselamatan dalam negeri, yang hendaklah menjadi Pengerusi;
- (b) Ketua Setiausaha Kementerian yang bertanggungjawab bagi hal ehwal luar negeri, atau wakilnya;
- (c) Ketua Setiausaha Kementerian yang bertanggungjawab bagi hal ehwal dalam negeri, atau wakilnya;
- (d) Ketua Setiausaha Kementerian yang bertanggungjawab bagi pembangunan wanita, keluarga dan masyarakat, atau wakilnya;
- (e) Ketua Setiausaha Kementerian yang bertanggungjawab bagi sumber manusia, atau wakilnya;
- (f) Ketua Setiausaha Kementerian yang bertanggungjawab bagi pengangkutan, atau wakilnya;
- (g) Ketua Setiausaha Kementerian yang bertanggungjawab bagi penerangan, atau wakilnya;
- (h) Peguam Negara Malaysia, atau wakilnya;

Rang Undang-Undang

- (i) Ketua Polis Negara, atau wakilnya;
- (j) Ketua Pengarah Imigresen, atau wakilnya;
- (k) Ketua Pengarah Kastam, atau wakilnya;
- (l) Ketua Pengarah Penguatkuasaan Maritim Malaysia, atau wakilnya;
- (m) seorang wakil Kementerian yang bertanggungjawab bagi keselamatan dalam negeri; dan
- (n) tidak lebih daripada tiga orang daripada pertubuhan bukan kerajaan atau organisasi lain yang berkaitan yang mempunyai pengalaman, pengetahuan dan kepakaran yang sesuai dalam masalah dan tentang isu yang berhubungan dengan pemerdagangan orang termasuk perlindungan dan bantuan orang yang diperdagangkan, yang dilantik oleh Menteri.

(3) Setiap anggota Majlis yang dilantik di bawah perenggan (2)(n) hendaklah, melainkan jika dia meletakkan jawatan terlebih dahulu, memegang jawatan selama suatu tempoh yang tidak melebihi dua tahun dan layak untuk dilantik semula.

(4) Mana-mana anggota Majlis yang dilantik di bawah perenggan (2)(n) boleh, pada bila-bila masa meletakkan jawatannya, dengan memberi notis secara bertulis kepada Menteri.

(5) Anggota Majlis yang dinyatakan di bawah subseksyen (2) boleh dibayar apa-apa elaun sebagaimana yang ditentukan oleh Menteri.

Fungsi dan kuasa Majlis

7. (1) Majlis hendaklah menjalankan fungsi menyelaraskan pelaksanaan Akta ini, merumuskan dasar dan program bagi mencegah dan menghapus pemerdagangan orang termasuklah program dalam memberikan bantuan kepada orang yang diperdagangkan, merumuskan program perlindungan bagi orang yang diperdagangkan dan memulakan program pendidikan untuk meningkatkan kesedaran awam tentang sebab dan akibat perbuatan pemerdagangan orang.

Antipemerdagangan Orang

(2) Tanpa rnenjejaskan keluasan makna subseksyen (1), adalah menjadi tanggungjawab Majlis untuk—

- (a) merumus dan menyelia pelaksanaan pelan tindakan kebangsaan mengenai pencegahan dan penghapusan pemerdagangan orang termasuklah bantuan dan perlindungan orang yang diperdagangkan;
- (b) membuat syor kepada Menteri tentang segala aspek pencegahan dan penghapusan pemerdagangan orang;
- (c) mengawasi corak imigrasi dan emigrasi di Malaysia bagi bukti pemerdagangan dan mendapatkan respons segera agensi atau badan kerajaan yang berkaitan, dan pertubuhan bukan kerajaan tentang masalah pemerdagangan orang yang dibawa kepada perhatian mereka;
- (d) menyelaraskan perumusan dasar dan mengawasi pelaksanaannya ke atas isu-isu pemerdagangan orang yang berkaitan dengan agensi atau badan kerajaan dan pertubuhan bukan kerajaan yang berkaitan;
- (e) merumuskan dan menyelaraskan langkah-langkah untuk memberitahu dan mendidik orang awam, termasuk orang-orang yang berkemungkinan diperdagangkan, tentang sebab dan akibat pemerdagangan orang;
- (f) bekerjasama dan menyelaraskan dengan badan antarabangsa dan badan atau jawatankuasa serantau lain yang serupa berhubung dengan masalah dan isu pemerdagangan orang termasuk bantuan dan perlindungan orang yang diperdagangkan;
- (g) menasihati kerajaan mengenai isu pemerdagangan orang termasuk perkembangan di peringkat antarabangsa terhadap perbuatan pemerdagangan orang;
- (h) mengumpul dan mengumpul semak data dan maklumat, dan memberi kuasa bagi penyelidikan, berhubung dengan pencegahan dan penghapusan pemerdagangan orang;
- (i) melaksanakan apa-apa fungsi lain sebagaimana yang diarahkan oleh Menteri bagi pelaksanaan Akta ini dengan sewajarnya.

Rang Undang-Undang

(3) Majlis hendaklah mempunyai segala kuasa sebagaimana yang perlu bagi, atau berkaitan, atau yang bersampingan dengan, pelaksanaan fungsinya di bawah Akta ini.

Kuasa Menteri untuk memberikan arahan

8. Menteri boleh, dari semasa ke semasa, memberikan Majlis arahan yang tidak berlawanan dengan Akta ini mengenai pelaksanaan fungsi dan kuasa Majlis dan Majlis hendaklah melaksanakan arahan itu.

Mesyuarat Majlis

9. (1) Majlis hendaklah bermesyuarat dengan seberapa kerap yang perlu bagi pelaksanaan fungsinya pada masa dan di tempat sebagaimana yang ditentukan oleh Pengerusi.

(2) Tujuh orang anggota, termasuk Pengerusi, hendaklah membentuk kuorum suatu mesyuarat Majlis.

(3) Pengerusi hendaklah mempengerusikan semua mesyuarat Majlis.

(4) Jika Pengerusi tidak berupaya atas apa jua sebab untuk mempengerusikan mana-mana mesyuarat Majlis, mesyuarat itu hendaklah dipengerusikan oleh seorang anggota yang dipilih daripada kalangan anggota yang hadir.

(5) Majlis boleh mengundang mana-mana orang untuk menghadiri mana-mana mesyuarat atau pertimbangtelitian Majlis bagi maksud menasihatinya tentang apa-apa perkara yang dibincangkan, tetapi orang itu tidak berhak untuk mengundi pada mesyuarat itu.

(6) Dalam mana-mana mesyuarat Majlis, Pengerusi hendaklah mempunyai suatu undi biasa dan hendaklah, sekiranya terdapat bilangan undi yang sama banyak, mempunyai undi pemutus.

(7) Mana-mana orang yang diundang di bawah subseksyen (5) boleh dibayar apa-apa elaun sebagaimana yang ditentukan oleh Menteri.

Antipemerdagangan Orang

(8) Tertakluk kepada peruntukan Akta ini, Majlis boleh membuat kaedah untuk mengawal selia mesyuarat dan prosidingnya.

Penubuhan Jawatankuasa

10. (1) Majlis boleh menubuhkan jawatankuasa yang difikirkannya perlu atau suai manfaat untuk membantunya melaksanakan fungsinya dan menjalankan kuasanya di bawah Akta ini.

(2) Suatu jawatankuasa yang ditubuhkan di bawah subseksyen(1)—

- (a) hendaklah dipengerusikan oleh mana-mana anggota Majlis yang dinyatakan di bawah perenggan 6(2)(b) hingga (m);
- (b) hendaklah mematuhi dan bertindak mengikut apa-apa arahan yang diberikan kepadanya oleh Majlis; dan
- (c) boleh menetapkan tataranya sendiri.

(3) Anggota jawatankuasa yang ditubuhkan di bawah subseksyen (1) boleh dilantik daripada kalangan anggota Majlis atau mana-mana orang lain sebagaimana yang difikirkan patut oleh Majlis.

(4) Kecuali bagi anggota Jawatankuasa yang dilantik daripada kalangan anggota Majlis, mana-mana orang lain yang dilantik sebagai anggota Jawatankuasa boleh dibayar apa-apa elaun sebagaimana yang ditentukan oleh Menteri.

(5) Anggota sesuatu jawatankuasa hendaklah memegang jawatan selama apa-apa tempoh sebagaimana yang dinyatakan dalam surat pelantikannya dan layak untuk dilantik semula.

(6) Majlis boleh membatalkan pelantikan mana-mana anggota sesuatu jawatankuasa tanpa memberi apa-apa sebab bagi pembatalan itu.

(7) Anggota sesuatu jawatankuasa boleh, pada bila-bila masa, meletakkan jawatan dengan memberikan notis secara bertulis kepada pengerusi jawatankuasa itu.

(8) Majlis boleh, pada bila-bila masa, memberhentikan atau mengubah keanggotaan sesuatu jawatankuasa.

(9) Suatu jawatankuasa hendaklah mengadakan mesyuaratnya pada masa dan di tempat sebagaimana yang ditentukan oleh pengerusi jawatankuasa.

Rang Undang-Undang

(10) Suatu jawatankuasa boleh mengundang mana-mana orang untuk menghadiri mesyuarat jawatankuasa bagi maksud menasihatinya tentang apa-apa perkara yang dibincangkan tetapi orang itu tidak berhak untuk mengundi pada mesyuarat tersebut.

(11) Mana-mana orang yang diundang di bawah subseksyen (10) boleh dibayar apa-apa elaun sebagaimana yang ditentukan oleh Menteri.

Setiausaha Majlis dan pegawai-pegawai lain

11. Menteri hendaklah melantik seorang pegawai awam sebagai Setiausaha Majlis dan pegawai awam lain sebagaimana yang perlu untuk membantu Majlis.

BAHAGIAN III

KESALAHAN PEMERDAGANGAN ORANG, KEKEBALAN, DSB.

Kesalahan pemerdagangan orang

12. Mana-mana orang, yang memperdagangkan orang yang bukan merupakan seorang kanak-kanak, bagi maksud eksploitasi, melakukan suatu kesalahan dan hendaklah, apabila disabitkan, dihukum dengan pemenjaraan selama tempoh tidak melebihi lima belas tahun, dan boleh juga didenda.

Kesalahan pemerdagangan orang dengan cara ancaman, kekerasan, dsb.

13. Mana-mana orang, yang memperdagangkan orang yang bukan merupakan seorang kanak-kanak, bagi maksud eksploitasi, dengan satu atau lebih cara yang berikut:

- (a) ancaman;
- (b) penggunaan kekerasan atau bentuk paksaan yang lain;
- (c) pemelarian;
- (d) fraud;
- (e) perdayaan;
- (f) penyalahgunaan kuasa;
- (g) penyalahgunaan kedudukan orang yang mudah terdedah kepada bahaya perbuatan. pemerdagangan orang; atau

Antipemerdagangan Orang

- (h) pemberian atau penerimaan bayaran atau faedah bagi memperoleh kerelaan seseorang yang mempunyai kawalan ke atas orang yang diperdagangkan,

melakukan suatu kesalahan dan hendaklah, apabila disabitkan, dihukum dengan pemenjaraan selama tempoh tidak kurang daripada tiga tahun tetapi tidak melebihi dua puluh tahun, dan boleh juga didenda.

Kesalahan pemerdagangan kanak-kanak

14. Mana-mana orang, yang memperdagangkan orang yang merupakan seorang kanak-kanak, bagi maksud eksploitasi, melakukan suatu kesalahan dan hendaklah, apabila disabitkan, dihukum dengan pemenjaraan selama tempoh tidak kurang daripada tiga tahun tetapi tidak melebihi dua puluh tahun, dan boleh juga didenda.

Kesalahan mendapatkan keuntungan daripada eksploitasi orang yang diperdagangkan

15. Mana-mana orang yang mendapatkan keuntungan daripada eksploitasi orang yang diperdagangkan melakukan suatu kesalahan dan hendaklah, apabila disabitkan, dihukum dengan pemenjaraan selama tempoh tidak melebihi lima belas tahun, dan boleh juga didenda tidak kurang daripada lima puluh ribu ringgit tetapi tidak melebihi lima ratus ribu ringgit.

Kerelaan orang yang diperdagangkan tidak relevan

16. Dalam sesuatu pendakwaan bagi kesalahan di bawah seksyen 12, 13 atau 14, tidaklah menjadi suatu pembelaan bahawa orang yang diperdagangkan itu merelakan perbuatan pemerdagangan orang.

Kelakuan seksual- lampau tidak relevan

17. Kelakuan seksual lampau orang yang diperdagangkan adalah tidak relevan dan tidak boleh diterima bagi maksud membuktikan bahawa orang yang diperdagangkan itu terlibat dengan kelakuan seksual lain atau untuk membuktikan kecenderungan seksual orang yang diperdagangkan itu.

Rang Undang-Undang

Dokumen perjalanan atau pengenalan diri fraud

18. Mana-mana orang yang membuat, memperoleh, memberi, menjual atau memiliki suatu dokumen perjalanan atau pengenalan diri fraud bagi maksud memudahkan suatu perbuatan pemerdagangan orang melakukan suatu kesalahan dan hendaklah, apabila disabitkan, dihukum dengan pemenjaraan selama tempoh tidak melebihi sepuluh tahun, dan boleh juga didenda tidak kurang daripada lima puluh ribu ringgit tetapi tidak melebihi lima ratus ribu ringgit.

Merekrut orang

19. Mana-mana orang yang dengan diketahuinya merekrut, atau bersetuju untuk merekrut, orang lain untuk menyertai pelakuan suatu perbuatan pemerdagangan orang melakukan suatu kesalahan dan hendaklah, apabila disabitkan, dihukum dengan pemenjaraan selama tempoh tidak melebihi sepuluh tahun, dan boleh juga didenda.

Menyediakan kemudahan bagi membantu pemerdagangan orang

20. Mana-mana orang yang merupakan—

- (a) pemunya, penghuni, penerima pajak atau orang yang bertanggungjawab ke atas mana-mana premis, bilik atau tempat, dengan diketahuinya membenarkan suatu mesyuarat diadakan di premis, bilik atau tempat itu; atau
- (b) pemunya, penerima pajak atau orang yang bertanggungjawab ke atas apa-apa kelengkapan atau kemudahan yang membolehkan perakaman, persidangan atau mesyuarat melalui teknologi, dengan diketahuinya membenarkan kelengkapan atau kemudahan itu digunakan,

bagi maksud melakukan apa-apa kesalahan di bawah Akta ini, melakukan suatu kesalahan dan hendaklah, apabila disabitkan, dihukum dengan pemenjaraan selama tempoh tidak melebihi sepuluh tahun, dan boleh juga didenda.

Antipemerdagangan Orang

Menyediakan perkhidmatan bagi maksud pemerdagangan orang

21. (1) Mana-mana orang yang, secara langsung atau tidak langsung, menyediakan atau mengadakan perkhidmatan atau kemudahan kewangan —

- (a) dengan niat bahawa perkhidmatan atau kemudahan itu akan digunakan, atau mengetahui atau mempunyai alasan yang munasabah untuk mempercayai bahawa perkhidmatan atau kemudahan itu akan digunakan, secara keseluruhan atau sebahagian, bagi maksud melakukan atau memudahkan pelakuan suatu perbuatan pemerdagangan orang, atau bagi maksud memanfaatkan mana-mana orang yang melakukan atau memudahkan pelakuan suatu perbuatan pemerdagangan orang; atau
- (b) mengetahui atau mempunyai alasan yang munasabah untuk mempercayai bahawa, secara keseluruhan atau sebahagian, perkhidmatan atau kemudahan itu akan digunakan oleh atau akan memanfaatkan mana-mana orang yang terlibat dalam suatu perbuatan pemerdagangan orang,

melakukan suatu kesalahan dan hendaklah, apabila disabitkan, dihukum dengan pemenjaraan selama tempoh tidak melebihi sepuluh tahun, dan boleh juga didenda.

(2) Bagi maksud subseksyen (1), "perkhidmatan atau kemudahan kewangan" termasuklah perkhidmatan atau kemudahan yang ditawarkan oleh peguam atau akauntan yang bertindak sebagai penama atau ejen kepada klien mereka.

Melindungi orang

22. (1) Mana-mana orang yang —

- (a) melindungi seseorang; atau
- (b) menghalang, menggalang atau mengganggu penangkapan seseorang,

dengan mengetahui atau mempunyai sebab yang munasabah untuk mempercayai bahawa orang itu telah melakukan atau sedang

Rang Undang-Undang

merancang atau berkemungkinan melakukan suatu perbuatan pemerdagangan orang, melakukan suatu kesalahan dan hendaklah, apabila disabitkan, dihukum dengan pemenjaraan selama tempoh tidak melebihi sepuluh tahun, dan boleh juga didenda.

(2) Dalam seksyen ini, "melindung" ertinya memberi seseorang tempat berlindung, makanan, minuman, wang atau pakaian, senjata, amunisi atau pengangkut, atau membantu seseorang dengan apa-apa cara bagi mengelakkan daripada ditangkap.

Obligasi pemunya, operator atau nakhoda pengangkut

23. (1) Mana-mana orang yang merupakan pemunya, operator atau nakhoda mana-mana pengangkut, yang mengambil bahagian dalam pengangkutan barang atau orang bagi keuntungan komersil hendaklah memastikan bahawa setiap orang yang menaiki pengangkut memiliki dokumen perjalanan bagi kemasukan sah orang itu ke dalam negara penerima.

(2) Mana-mana pemunya, operator atau nakhoda mana-mana pengangkut yang disebut dalam subseksyen (1), yang —

- (a) dengan diketahuinya membenarkan atau mempunyai alasan yang munasabah untuk mempercayai bahawa pengangkut itu digunakan bagi maksud membawa seseorang ke dalam negara penerima tanpa dokumen perjalanan yang dikehendaki bagi kemasukan sah orang itu ke dalam negara penerima; atau
- (b) dengan diketahuinya membenarkan atau mempunyai alasan yang munasabah untuk mempercayai bahawa pengangkut itu digunakan bagi maksud melakukan suatu perbuatan pemerdagangan orang,

melakukan suatu kesalahan dan boleh, apabila disabitkan —

- (a) jika orang itu seorang individu, didenda tidak melebihi dua ratus lima puluh ribu ringgit atau dipenjarakan selama tempoh tidak melebihi lima tahun atau kedua-duanya; atau
- (b) jika orang itu merupakan pertubuhan perbadanan, didenda tidak kurang daripada lima puluh ribu ringgit tetapi tidak melebihi lima ratus ribu ringgit.

Antipemerdagangan Orang

(3) Dalam mana-mana prosiding bagi suatu kesalahan di bawah seksyen ini, adalah menjadi suatu pembelaan bagi pemunya, operator atau nakhoda itu untuk membuktikan bahawa—

- (a) dia mempunyai alasan yang munasabah untuk mempercayai bahawa dokumen perjalanan orang yang menaiki pengangkut adalah dokumen perjalanan yang dikehendaki bagi kemasukan sah orang itu ke dalam negara penerima;
- (b) orang yang menaiki pengangkut memiliki dokumen perjalanan yang dikehendaki bagi kemasukan sah ke negara penerima apabila orang itu menaiki, atau terakhir menaiki, pengangkut itu untuk perjalanan ke negara penerima; atau
- (c) kemasukan orang itu ke dalam negara penerima berlaku semata-mata oleh sebab penyakit atau kecederaan pada orang itu, tekanan cuaca atau apa-apa keadaan lain yang di luar kawalan pemunya, operator atau nakhoda.

(4) Mana-mana orang yang disabitkan atas suatu kesalahan di bawah seksyen ini boleh dikehendaki membayar kos penahanan orang yang diperdagangkan di, dan pemindahan orang yang diperdagangkan dari, negara penerima.

Peninggalan sengaja untuk memberi maklumat

24. Mana-mana orang yang mengetahui atau mempunyai sebab untuk mempercayai bahawa apa-apa kesalahan di bawah Akta ini telah atau akan dilakukan, dengan sengaja tidak memberi apa-apa maklumat berkenaan dengan kesalahan itu, melakukan suatu kesalahan dan boleh, apabila disabitkan, didenda tidak melebihi dua ratus lima puluh ribu ringgit atau dipenjarakan selama tempoh tidak melebihi lima tahun, atau kedua-duanya.

Kekebalan daripada pendakwaan jenayah

25. Orang yang diperdagangkan tidak boleh dikenakan pendakwaan jenayah berkenaan dengan—

- (a) kemasukan secara haram orang itu ke dalam negara penerima;
- (b) tempoh pemastautinan orang itu yang tidak sah di negara penerima; atau

Rang Undang-Undang

- (c) pemerolehan atau pemilikan apa-apa dokumen perjalanan atau pengenalan diri fraud yang diperolehnya, atau apa-apa dokumen perjalanan atau pengenalan diri fraud yang dibekalkan kepadanya, bagi maksud memasuki negara penerima,

jika perbuatan sedemikian adalah akibat langsung daripada sesuatu perbuatan peraerdagangan orang yang dikatakan dilakukan atau telah dilakukan.

Perlindungan pemberi maklumat

26. (1) Kecuali sebagaimana yang diperuntukkan dalam seksyen ini, tiada aduan bagi suatu kesalahan di bawah Akta ini boleh diterima menjadi keterangan dalam mana-mana prosiding sivil atau jenayah, dan tiada saksi boleh dikehendaki atau dibenarkan untuk menzahirkan nama atau alamat mana-mana pemberi maklumat, atau menyatakan apa-apa perkara yang mungkin menyebabkan pemberi maklumat diketahui.

(2) Jika apa-apa buku, dokumen atau kertas yang menjadi keterangan atau yang boleh diperiksa dalam mana-mana prosiding sivil atau jenayah mengandungi apa-apa catatan yang dalamnya mana-mana pemberi maklumat dinamakan atau diperihalkan atau yang mungkin menyebabkan dia diketahui, mahkamah yang ke hadapannya prosiding itu diadakan hendaklah menyebabkan semua catatan sedemikian ditutup daripada penglihatan atau dipadam setakat yang perlu untuk melindungi pemberi maklumat itu daripada diketahui.

(3) Jika dalam perbicaraan bagi apa-apa kesalahan di bawah Akta ini, Mahkamah, selepas siasatan penuh tentang kes itu, berpendapat bahawa pemberi maklumat itu dengan sengaja membuat dalam aduannya suatu pernyataan material yang dia tahu atau percaya adalah palsu atau tidak percaya adalah benar, atau jika dalam apa-apa prosiding lain mahkamah berpendapat bahawa keadilan tidak dapat dilaksanakan sepenuhnya antara pihak-pihak dalam prosiding itu tanpa mengetahui siapa pemberi maklumat itu, Mahkamah boleh menghendaki pengemukaan aduan asal, jika bertulis, dan membenarkan siasatan dan menghendaki penzahiran sepenuhnya tentang pemberi maklumat itu.

(4) Mana-mana orang yang memberikan apa-apa maklumat yang disebut dalam seksyen ini, sedangkan dia tahu bahawa maklumat itu adalah palsu, melakukan suatu kesalahan.

Antipemerdagangan Orang

BAHAGIAN IV

PENGUATKUASAAN

Pegawai penguat kuasa

27. (1) Pegawai yang berikut hendaklah menjadi pegawai penguat kuasa bagi maksud Akta ini dan bolehlah menjalankan segala kuasa penguatkuasaan —

- (a) mana-mana pegawai polis;
- (b) mana-mana pegawai imigresen;
- (c) mana-mana Pegawai kastam; atau
- (d) mana-mana pegawai Agensi Penguatkuasaan Maritim Malaysia.

(2) Seseorang pegawai penguat kuasa apabila bertindak terhadap mana-mana orang di bawah Akta ini, hendaklah menyatakan jawatannya dan hendaklah mengemukakan kepada orang yang terhadapnya dia bertindak apa-apa kad kuasa yang telah dikeluarkan kepadanya.

Kuasa penyiasatan

28. Seseorang pegawai penguat kuasa hendaklah mempunyai segala kuasa yang perlu untuk menjalankan penyiasatan bagi apa-apa kesalahan di bawah Akta ini.

Kuasa penangkapan

29. (1) Seseorang pegawai penguat kuasa boleh menangkap tanpa waran mana-mana orang —

- (a) yang didapati melakukan atau cuba melakukan atau bersubahat dalam pelakuan suatu kesalahan di bawah Akta ini; atau
- (b) yang dengan semunasabahnya disyaki oleh pegawai penguat kuasa sebagai terlibat dalam melakukan atau cuba melakukan atau bersubahat dalam pelakuan suatu kesalahan di bawah Akta ini.

Rang Undang-Undang

(2) Seseorang pegawai penguat kuasa yang membuat penangkapan di bawah subseksyen (1) hendaklah, tanpa kelengahan yang tidak perlu, membawa orang yang ditangkap itu ke balai polis yang paling hampir, dan selepas itu orang itu hendaklah diperlakukan mengikut undang-undang yang berhubungan dengan tatacara jenayah yang sedang berkuat kuasa.

Pengeledahan dan penyitaan dengan waran

30. (1) Jika seseorang Majistret mendapati, atas maklumat bersumpah yang bertulis dan selepas apa-apa siasatan sebagaimana yang difikirkan perlu oleh Majistret itu, bahawa terdapat sebab yang munasabah untuk mempercayai bahawa —

- (a) mana-mana premis atau pengangkut telah digunakan atau akan digunakan bagi; atau
- (b) ada di dalam mana-mana premis atau pengangkut keterangan yang perlu bagi menjalankan penyiasatan mengenai,

pelakuan suatu kesalahan di bawah Akta ini, Majistret boleh mengeluarkan suatu waran yang memberi kuasa kepada pegawai penguat kuasa yang dinamakan dalam waran itu, pada bila-bila masa yang munasabah, sama ada pada waktu siang atau malam, untuk memasuki premis atau pengangkut itu.

(2) Waran yang dikeluarkan di bawah subseksyen (1) boleh memberi kuasa kepada pegawai penguat kuasa untuk—

- (a) menggeledah premis atau pengangkut itu, dan untuk menyita atau mengalihkan dari premis atau pengangkut itu, apa-apa harta alih, buku, rekod, laporan atau dokumen, atau apa-apa organ manusia, yang dengan semunasabahnya dipercayai dapat memberikan keterangan mengenai pelakuan kesalahan itu; dan
- (b) membuat salinan, atau mengambil cabutan daripada mana-mana buku, rekod, laporan atau dokumen yang dijumpai di premis atau pengangkut itu.

(3) Seseorang pegawai penguat kuasa yang memasuki mana-mana premis atau pengangkut di bawah seksyen ini boleh membawa bersamanya mana-mana orang lain dan kelengkapan sebagaimana yang didapatinya perlu.

Antipemerdagangan Orang

(4) Seseorang pegawai penguat kuasa boleh, pada menjalankan kuasanya di bawah seksyen ini, jika perlu—

- (a) memecah buka mana-mana pintu luar atau dalam premis atau pengangkut itu atau apa-apa halangan kepada premis atau pengangkut itu untuk masuk ke dalam premis atau pengangkut itu;
- (b) mengalihkan dengan kekerasan apa-apa halangan kepada kemasukan, penggeledahan, penyitaan atau pengalihan sebagaimana yang dia diberi kuasa untuk melaksanakan di bawah seksyen ini; dan
- (c) menahan mana-mana orang yang dijumpai di dalam premis atau pengangkut itu sehingga penggeledahan itu selesai.

(5) Jika, oleh sebab jenis, saiz atau amaunnya, adalah tidak munasabah untuk mengalihkan apa-apa harta alih, buku, rekod, laporan atau dokumen atau apa-apa organ manusia yang disita di bawah seksyen ini, pegawai penguat kuasa itu hendaklah, dengan apa-apa cara, mengelak harta alih, buku, rekod, laporan atau dokumen atau apa-apa organ manusia itu dalam premis atau pengangkut yang di dalamnya ia dijumpai.

(6) Seseorang yang, tanpa kuasa sah, memecahkan, mengganggu atau merosakkan lak yang disebut dalam subseksyen (5) atau mengalihkan harta alih, buku, rekod, laporan atau dokumen atau apa-apa organ manusia yang dilak atau cuba berbuat demikian, melakukan suatu kesalahan.

Pengeledahan dan penyitaan tanpa waran

31. (1) Jika seseorang pegawai penguat kuasa mempunyai alasan yang munasabah untuk mempercayai bahawa oleh sebab kelengahan dalam memperoleh waran geledah di bawah seksyen 30, penyiasatan akan terjejas atau keterangan mengenai pelakuan kesalahan itu mungkin diganggu, dialihkan, dirosakkan atau dimusnahkan, dia boleh, tanpa waran, dengan apa-apa bantuan dan kekerasan sebagaimana yang perlu —

- (a) memasuki dan menggeledah mana-mana premis;

Rang Undang-Undang

- (b) memberhentikan dan memeriksa mana-mana pengangkut atau orang;
- (c) menyita dan menahan pengangkut, harta alih, buku, rekod, laporan atau dokumen atau organ manusia; atau
- (d) memeriksa, membuat salinan atau mengambil cabutan daripada apa-apa buku, rekod, laporan atau dokumen yang dijumpai dalam premis atau pengangkut itu.

(2) Pada menjalankan kuasanya di bawah seksyen ini, seseorang pegawai penguat kuasa hendaklah mempunyai segala kuasa yang diberikan kepadanya di bawah subseksyen 30(3), (4) dan (5).

Capaian kepada data berkomputer

32. (1) Mana-mana pegawai penguat kuasa yang menjalankan penggeledahan di bawah Akta ini hendaklah diberi capaian kepada data berkomputer sama ada yang distorkan dalam suatu komputer atau selainnya.

(2) Bagi maksud subseksyen (1), pegawai penguat kuasa itu hendaklah diberikan kata laluan, kod penyulitan, kod penyahsulitan, perisian atau perkakasan yang perlu atau apa-apa cara lain yang dikehendaki untuk capaiannya bagi membolehkan pemahaman data berkomputer itu.

Senarai benda yang disita

33. (1) Kecuali sebagaimana yang diperuntukkan dalam subseksyen (2), jika apa-apa pengangkut, harta alih, buku, rekod, laporan atau dokumen atau apa-apa organ manusia disita di bawah Bahagian ini, pegawai penguat kuasa hendaklah menyediakan suatu senarai benda yang disita dan dengan serta-merta menghantARSERahkan satu salinan yang ditandatangani olehnya kepada penghuni premis atau pemunya pengangkut yang telah digeledah, atau kepada ejen atau pekerjanya, di premis atau pengangkut itu.

(2) Jika premis itu tidak berpenghuni, pegawai penguat kuasa itu hendaklah, bila-bila masa mungkin, menampalkan suatu senarai benda yang disita itu di tempat yang mudah dilihat pada atau di tempat atau premis itu.

Antipemerdagangan Orang

Kuasa untuk memeriksa orang

34. (1) Seseorang pegawai penguat kuasa boleh, melalui notis secara bertulis, menghendaki mana-mana orang yang dipercayainya mengetahui fakta dan hal keadaan sesuatu kes itu untuk—

- (a) hadir di hadapannya bagi pemeriksaan;
- (b) mengemukakan ke hadapannya apa-apa harta alih, rekod, laporan atau dokumen; atau
- (c) memberinya pernyataan bertulis yang dibuat dengan bersumpah atau berikrar yang rnenyatakan apa-apa maklumat sebagaimana yang dikehendakinya.

(2) Mana-mana orang yang melanggar subseksyen (1) melakukan suatu kesalahan.

(3) Orang yang diperiksa di bawah subseksyen (1) hendaklah terikat di sisi undang-undang untuk menjawab semua soalan yang berhubungan dengan kes itu yang diajukan kepadanya oleh pegawai penguat kuasa, tetapi dia boleh enggan menjawab mana-mana soalan yang jawapannya berkecenderungan mendedahkannya kepada suatu pertuduhan jenayah atau penalti atau pelucuthakan.

(4) Orang yang membuat pernyataan di bawah perenggan (1)(c) hendaklah terikat di sisi undang-undang untuk menyatakan yang benar, sama ada atau tidak pernyataan itu dibuat kesemuanya atau sebahagiannya dalam menjawab soalan pegawai penguat kuasa itu.

(5) Seseorang pegawai penguat kuasa yang memeriksa seseorang di bawah subseksyen (1) hendaklah terlebih dahulu memaklumkan orang itu mengenai peruntukan subseksyen (3) dan (4).

(6) Suatu pernyataan yang dibuat oleh mana-mana orang di bawah subseksyen (3) atau (4) hendaklah dijadikan dalam bentuk bertulis dan ditandatangani oleh orang yang membuatnya atau dicapkan dengan cap ibu jarinya—

- (a) selepas pernyataan itu dibacakan kepadanya dalam bahasa dia membuatnya; dan
- (b) selepas dia diberi peluang untuk membuat apa-apa pembetulan yang dia mahu.

Rang Undang-Undang

Kebolehterimaan pernyataan

35. (1) Kecuali sebagaimana yang diperuntukkan dalam seksyen ini, tiada pernyataan yang dibuat oleh mana-mana orang kepada seseorang pegawai penguat kuasa semasa penyiasatan dibuat di bawah Akta ini boleh digunakan dalam keterangan.

(2) Apabila mana-mana saksi dipanggil bagi pendakwaan atau bagi pembelaan, selain tertuduh, Mahkamah hendaklah, atas permintaan tertuduh atau pendakwa, merujuk kepada mana-mana pernyataan yang dibuat oleh saksi itu kepada seseorang pegawai penguat kuasa semasa suatu penyiasatan di bawah Akta ini dan boleh kemudiannya, jika Mahkamah berpendapat patut demi kepentingan keadilan, mengarahkan tertuduh untuk diberi suatu salinan pernyataan itu dan pernyataan itu boleh digunakan untuk mencabar kebolehpercayaan saksi mengikut cara yang diperuntukkan oleh Akta Keterangan 1950 [*Akta 56*].

(3) Jika tertuduh telah membuat suatu pernyataan semasa sesuatu penyiasatan, pernyataan itu boleh diterima sebagai keterangan bagi menyokong pembelaannya semasa perbicaraan.

(4) Tiada apa-apa jua dalam seksyen ini boleh disifatkan terpakai bagi mana-mana pernyataan yang dibuat semasa suatu perbarisan cam atau terangkum dalam seksyen 27 atau perenggan 32(1)(a), (i) dan (j) Akta Keterangan 1950.

(5) Apabila mana-mana orang dipertuduh atas apa-apa kesalahan berhubung dengan—

(a) pembuatan; atau

(b) kandungan,

apa-apa pernyataan yang dibuat olehnya kepada seseorang pegawai penguat kuasa semasa sesuatu penyiasatan yang dibuat di bawah Akta ini, pernyataan itu boleh digunakan sebagai keterangan dalam kes pendakwaan.

Pelucuthakan pengangkut, harta alih, dsb.

36. (1) Semua pengangkut, harta alih, buku, rekod, laporan atau dokumen, atau mana-mana organ manusia yang disita pada menjalankan apa-apa kuasa yang diberikan di bawah Akta ini boleh dilucuthakkan.

Antipemerdagangan Orang

(2) Mahkamah yang membicarakan mana-mana orang yang dituduh atas suatu kesalahan di bawah Akta ini boleh pada akhir perbicaraan itu, sama ada dia disabitkan atau tidak, memerintahkan supaya pengangkut, harta alih, buku, rekod, laporan atau dokumen atau mana-mana organ manusia yang disita daripada orang itu dilucuthakkan.

(3) Jika tiada pendakwaan berkenaan dengan apa-apa kesalahan di bawah Akta ini —

- (a) dalam hal organ manusia yang disita, organ manusia yang disita itu hendaklah disifatkan dilucuthakkan; dan
- (b) dalam hal pengangkut, harta alih, buku, rekod, laporan atau dokumen yang disita, pegawai penguat kuasa hendaklah menyampaikan suatu notis secara bertulis ke alamat terakhir yang diketahui orang yang daripadanya pengangkut, harta alih, buku, rekod, laporan atau dokumen itu disita.

(4) Notis di bawah perenggan (3)(b) hendaklah menyatakan bahawa tiada pendakwaan berkenaan dengan pengangkut, harta alih, buku, rekod, laporan atau dokumen itu dan bahawa pengangkut, harta alih, buku, rekod, laporan atau dokumen itu akan dilucuthakkan apabila tamat tempoh satu bulan kalendar dari tarikh penyampaian notis melainkan jika suatu tuntutan dibuat oleh orang yang daripadanya pengangkut, harta alih, buku, rekod, laporan atau dokumen itu disita.

(5) Apabila notis yang dikeluarkan di bawah perenggan (3)(b) diterima, mana-mana orang yang menegaskan bahawa dia adalah pemunya apa-apa pengangkut, harta alih, buku, rekod, laporan atau dokumen yang disita di bawah Akta ini yang tidak boleh dilucuthakkan boleh, secara sendiri atau melalui ejennya yang diberi kuasa secara bertulis olehnya, memberikan notis bertulis kepada pegawai penguat kuasa yang dalam milikannya pengangkut, harta alih, buku, rekod, laporan atau dokumen itu dipegang.

(6) Apabila suatu notis di bawah subseksyen (5) diterima, pegawai penguat kuasa yang membuat penyitaan hendaklah merujuk perkara itu kepada Mahkamah bagi penentuannya.

(7) Mahkamah yang kepadanya perkara itu dirujuk hendaklah mengeluarkan suatu saman menghendaki orang yang menegaskan bahawa dia ialah pemunya pengangkut, harta alih, buku, rekod,

Rang Undang-Undang

laporan atau dokumen dan orang yang daripadanya ia disita hadir ke hadapan Mahkamah itu, dan apabila mereka hadir atau ingkar untuk hadir, tetapi penyampaian saman dengan sewajarnya telah dibuktikan, Mahkamah hendaklah meneruskan pemeriksaan perkara itu, dan apabila terbukti bahawa pengangkut, harta alih, buku, rekod, laporan atau dokumen itu ialah hal perkara atau telah digunakan dalam pelakuan sesuatu kesalahan di bawah Akta ini, hendaklah memerintahkan supaya pengangkut, harta alih, buku, rekod, laporan atau dokumen itu dilucuthakkan atau boleh, semasa ketiadaan bukti sedemikian, memerintahkan pelepasan pengangkut, harta alih, buku, rekod, laporan atau dokumen itu kepada orang yang berhak kepadanya.

(8) Mana-mana pengangkut, harta alih, buku, rekod, laporan atau dokumen atau mana-mana organ manusia yang dilucuthakkan atau disifatkan dilucuthakkan hendaklah dilupuskan mengikut apa-apa cara sebagaimana yang difikirkan patut oleh pegawai penguat kuasa.

Kos memegang pengangkut, harta alih, dsb., yang disita

37. Jika apa-apa pengangkut, harta alih, rekod, laporan atau dokumen atau organ manusia yang disita di bawah Akta ini dipegang dalam jagaan pegawai penguat kuasa sementara menunggu penyelesaian apa-apa prosiding yang berkenaan dengan sesuatu kesalahan di bawah Akta ini, kos bagi memegang pengangkut, harta alih, rekod, laporan atau dokumen atau mana-mana organ manusia itu dalam jagaan hendaklah, sekiranya mana-mana orang didapati bersalah atas suatu kesalahan, menjadi hutang sivil yang kena dibayar kepada Kerajaan oleh orang itu dan hendaklah didapatkan dengan sewajarnya.

Tiada kos atau ganti rugi yang berbangkit daripada kemasukan, penggeledahan atau penyitaan boleh didapatkan

38. Tiada seorang pun, berkenaan dengan mana-mana kemasukan atau penggeledahan, atau penyitaan mana-mana pengangkut, harta alih, rekod, laporan atau dokumen atau mana-mana organ manusia, yang disita pada menjalankan apa-apa kuasa yang diberikan oleh Akta ini, berhak kepada kos kemasukan, penggeledahan atau penyitaan itu atau kepada apa-apa ganti rugi atau relief lain melainkan jika kemasukan, penggeledahan atau penyitaan itu dibuat tanpa sebab yang munasabah.

Antipemerdagangan Orang

Halangan

39. Mana-mana orang yang menghalang, merintang, mengganggu atau gagal untuk mematuhi permintaan yang sah seseorang pegawai penguat kuasa dalam melaksanakan fungsinya di bawah Akta ini melakukan suatu kesalahan.

Pemberian maklumat

40. (1) Mana-mana orang yang —

- (a) mengetahui atau mempunyai alasan yang munasabah untuk mengesyaki bahawa seseorang pegawai penguat kuasa sedang bertindak, atau bercadang untuk bertindak, berkaitan dengan suatu penyiasatan yang sedang, atau akan, dijalankan di bawah atau bagi maksud Akta ini dan menzahirkan kepada mana-mana orang lain maklumat atau apa-apa perkara lain yang mungkin akan menjejaskan penyiasatan itu atau penyiasatan yang dicadangkan itu; atau
- (b) mengetahui atau mempunyai alasan yang munasabah untuk mengesyaki bahawa suatu penzahiran telah dibuat kepada seorang pegawai penguat kuasa di bawah Akta ini dan menzahirkan kepada mana-mana orang lain maklumat atau mana-mana perkara lain yang mungkin menjejaskan apa-apa penyiasatan yang mungkin dijalankan berikutan dengan penzahiran itu,

melakukan suatu kesalahan.

(2) Tiada apa-apa jua dalam subseksyen (1) menjadikan suatu kesalahan bagi seseorang peguam bela dan peguam cara atau pekerjanya untuk menzahirkan apa-apa maklumat atau perkara lain—

- (a) kepada kliennya atau wakil kliennya berkaitan dengan pemberian nasihat kepada klien itu semasa dan bagi maksud khidmat profesional peguam bela dan peguam cara itu; atau
- (b) kepada mana-mana orang dalam menjangkakan, atau berkaitan dengan dan bagi maksud, apa-apa prosiding undang-undang.

Rang Undang-Undang

(3) Subseksyen (2) tidaklah terpakai berhubung dengan apa-apa maklumat atau perkara lain yang dizahirkan dengan tujuan untuk melaksanakan apa-apa maksud yang menyalahi undang-undang.

(4) Dalam presiding terhadap seseorang bagi suatu kesalahan di bawah seksyen ini, adalah suatu pembelaan untuk membuktikan bahawa—

- (a) dia tidak mengetahui atau mengesyaki bahawa penzahiran yang dibuat di bawah perenggan (1)(b) berkemungkinan menjejaskan penyiasatan itu; atau
- (b) dia mempunyai kuasa sah atau alasan munasabah untuk membuat penzahiran itu.

Pemulaan pendakwaan

41. Tiada pendakwaan bagi suatu kesalahan di bawah Akta ini boleh dimulakan kecuali oleh atau dengan keizinan bertulis Pendakwa Raya.

BAHAGIAN V

JAGAAN DAN PERLINDUNGAN ORANG YANG DIPERDAGANGKAN

Tempat perlindungan

42. (1) Menteri boleh, melalui pemberitahuan dalam *Warta*, mengisytiharkan mana-mana rumah, bangunan atau tempat, atau mana-mana bahagian rumah, bangunan atau tempat itu, menjadi tempat perlindungan bagi jagaan dan perlindungan orang yang diperdagangkan dan boleh, dengan cara yang sama, mengisytiharkan bahawa tempat perlindungan itu terhenti menjadi suatu tempat perlindungan.

(2) Menteri boleh, dari semasa ke semasa, mengarahkan pengasingan kategori berlainan orang yang diperdagangkan, antara lain, mengikut umur dan jantina sama ada di tempat perlindungan yang sama atau di tempat perlindungan yang berlainan.

Antipemerdagangan Orang

Pelantikan Pegawai Pelindung

43. (1) Menteri, selepas berunding dengan Menteri yang dipertanggungjawabkan dengan tanggungjawab bagi pembangunan wanita, keluarga dan masyarakat boleh, melalui pemberitahuan dalam *Warta*, melantik apa-apa bilangan Pegawai Kebajikan Masyarakat atau mana-mana pegawai awam lain untuk menjalankan kuasa dan melaksanakan kewajipan seorang Pegawai Pelindung di bawah Akta ini tertakluk kepada apa-apa syarat sebagaimana yang dinyatakan dalam pemberitahuan itu.

(2) Pegawai Pelindung hendaklah —

- (a) mempunyai kawalan ke atas dan tanggungjawab bagi jagaan dan perlindungan orang yang diperdagangkan di tempat perlindungan;
- (b) menjalankan siasatan dan menyebabkan supaya disediakan laporan mengenai orang yang diperdagangkan sebagaimana yang dikehendaki di bawah Akta ini;
- (c) mempunyai kuasa untuk mengawasi orang yang diperdagangkan apabila diperintahkan oleh Majistret atau diarahkan oleh Menteri; dan
- (d) mempunyai apa-apa kuasa, kewajipan dan fungsi lain sebagaimana yang ditetapkan oleh Menteri.

Mengambil orang ke dalam jagaan sementara

44. (1) Seseorang pegawai penguat kuasa boleh, atas syak yang munasabah bahawa orang yang dijumpai atau diselamatkan ialah orang yang diperdagangkan, mengambil orang itu ke dalam jagaan sementara dan mengemukakan orang itu ke hadapan Majistret dalam masa dua puluh empat jam, tidak termasuk masa yang perlu bagi perjalanan ke Mahkamah Majistret, bagi maksud memperoleh perintah perlindungan interim.

(2) Majistret boleh membuat perintah perlindungan interim bagi orang yang ditempatkan di tempat perlindungan selama tempoh empat belas hari bagi maksud menjalankan penyiasatan dan siasatan di bawah seksyen 51.

(3) Pegawai penguat kuasa hendaklah, apabila memperoleh perintah yang dikeluarkan di bawah subseksyen (2), menyerahkan

Rang Undang-Undang

orang yang diperdagangkan itu kepada Pegawai Pelindung untuk menempatkan orang yang diperdagangkan itu di tempat perlindungan yang dinyatakan dalam perintah.

Orang dalam jagaan sementara yang memerlukan pemeriksaan atau rawatan perubatan

45. (1) Jika seseorang pegawai penguat kuasa yang mengambil seseorang ke dalam jagaan sementara di bawah subseksyen 44(1) berpendapat bahawa orang itu memerlukan pemeriksaan atau rawatan perubatan, pegawai penguat kuasa boleh, daripada mengemukakan orang itu ke hadapan Majistret, membawanya kepada pegawai perubatan.

(2) Jika pada masa diambil ke dalam jagaan sementara, orang itu adalah pesakit di dalam hospital, pegawai penguat kuasa boleh meninggalkan orang itu di hospital itu.

Pemeriksaan dan rawatan perubatan

46. Seseorang pegawai perubatan yang di hadapannya seseorang dibawa di bawah seksyen 45 —

- (a) hendaklah menjalankan atau menyebabkan dijalankan suatu pemeriksaan ke atas orang itu;
- (b) boleh dalam memeriksa orang itu dan jika dibenarkan oleh pegawai penguat kuasa, menjalankan atau menyebabkan dijalankan apa-apa tatacara dan ujian sebagaimana yang perlu untuk mendiagnosis keadaan orang itu; atau
- (c) boleh memberikan atau menyebabkan diberikan apa-apa rawatan sebagaimana yang dirasakannya perlu hasil daripada diagnosis itu.

Kebenaran untuk dimasukkan ke hospital

47. Jika seseorang yang diambil ke dalam jagaan sementara di bawah subseksyen 44(1) ialah seorang kanak-kanak dan pegawai perubatan yang memeriksa orang itu berpendapat bahawa kemasukannya ke hospital adalah perlu bagi maksud jagaan atau rawatan perubatan, seseorang pegawai penguat kuasa boleh membenarkan orang itu untuk dimasukkan ke hospital.

Antipemerdagangan Orang

Kawalan ke atas orang yang dimasukkan ke hospital

48. Jika seseorang yang diambil ke dalam jagaan sementara di bawah subseksyen 44(1) dimasukkan ke hospital, pegawai penguat kuasa hendaklah mempunyai kawalan ke atas, dan tanggungjawab bagi keselamatan dan perlindungan orang itu.

Langkah yang perlu diambil selepas pemeriksaan atau rawatan perubatan

49. (1) Seseorang yang diambil ke dalam jagaan sementara di bawah subseksyen 44(1) dan diperiksa dari segi perubatan di bawah seksyen 46 hendaklah dibawa ke hadapan Majistret dalam masa dua puluh empat jam —

- (a) apabila selesai pemeriksaan atau rawatan itu; atau
- (b) jika orang itu dimasukkan ke hospital, apabila dibenarkan keluar dari hospital.

(2) Jika adalah tidak mungkin untuk membawa orang itu ke hadapan Majistret dalam masa yang dinyatakan dalam subseksyen (1), orang itu hendaklah ditempatkan di tempat perlindungan sehingga suatu masa orang itu boleh dibawa ke hadapan Majistret.

Tiada liabiliti ditanggung kerana memberikan kebenaran

50. (1) Jika seseorang yang diperiksa atau dirawat di bawah Bahagian ini —

- (a) pegawai penguat kuasa yang membenarkan pemeriksaan atau rawatan itu;
- (b) pegawai perubatan yang memeriksa atau merawat orang itu; dan
- (c) semua orang yang bertindak dalam membantu pegawai perubatan itu,

tidaklah menanggung apa-apa liabiliti di sisi undang-undang hanya oleh sebab seseorang telah diperiksa atau dirawat menurut Bahagian ini.

Rang Undang-Undang

(2) Tiada apa-apa jua yang terkandung dalam subseksyen (1) melepaskan seseorang pegawai perubatan daripada liabiliti berkenaan dengan pemeriksaan atau rawatan orang yang diambil ke dalam jagaan sementara di bawah subseksyen 44(1), yang liabilitinya itu dia akan tertakluk sekiranya pemeriksaan atau rawatan itu dijalankan atau diberikan dengan keizinan ibu atau bapa atau penjaga orang itu atau orang yang mempunyai kuasa untuk mengizinkan pemeriksaan atau rawatan itu.

Penyiasatan, siasatan dan Perintah Perlindungan

51. (1) Jika suatu perintah perlindungan interim dibuat di bawah subseksyen 44(2), dalam masa empat belas hari dari tarikh perintah itu—

- (a) seorang pegawai penguat kuasa hendaklah menyiasat keadaan kes orang itu bagi maksud menentukan sama ada orang itu adalah orang yang diperdagangkan di bawah Akta ini; dan
- (b) seorang Pegawai Pelindung hendaklah menjalankan siasatan terhadap latar belakang orang itu.

(2) Apabila selesai sesuatu penyiasatan dan siasatan di bawah subseksyen (1), pegawai penguat kuasa dan Pegawai Pelindung hendaklah menyediakan suatu laporan dan mengemukakan laporan itu bersama-sama dengan orang itu ke hadapan Mahkamah Majistret bagi maksud memuaskan hati Majistret bahawa orang itu adalah orang yang diperdagangkan di bawah Akta ini.

(3) Jika Majistret, selepas membaca laporan yang dikemukakan di bawah subseksyen (2), berpuas hati bahawa orang yang dibawa ke hadapannya—

- (a) ialah orang yang diperdagangkan dan memerlukan jagaan dan perlindungan, Majistret boleh membuat suatu Perintah Perlindungan —
 - (i) dalam hal orang yang diperdagangkan ialah seorang warganegara atau pemastautin tetap Malaysia, memerintahkan orang yang diperdagangkan itu ditempatkan di tempat perlindungan selama tempoh tidak melebihi dua tahun dari tarikh perintah itu; atau

Antipemerdagangan Orang

- (ii) dalam hal orang yang diperdagangkan ialah seorang warganegara asing, memerintahkan orang yang diperdagangkan itu ditempatkan di tempat perlindungan selama tempoh tidak melebihi tiga bulan dari tarikh perintah itu, dan selepas itu melepaskannya kepada pegawai imigresen untuk tindakan yang perlu mengikut peruntukan Akta Imigresen 1959/63;

(b) bukan orang yang diperdagangkan, Majistret boleh—

- (i) dalam hal seorang warganegara atau pemastautin tetap Malaysia, memerintahkan orang itu dilepaskan; atau
- (ii) dalam hal seorang warganegara asing, memerintahkan orang itu dilepaskan kepada pegawai imigresen untuk tindakan yang perlu mengikut peruntukan Akta Imigresen 1959/63.

(4) Majistret boleh pada bila-bila masa, atas permohonan pegawai penguat kuasa atau Pegawai Pelindung, mengikut mana-mana yang berkenaan, melanjutkan atau membatalkan Perintah Perlindungan yang dibuat di bawah seksyen ini.

(5) Walau apa pun subseksyen (4), jika orang yang diperdagangkan itu ialah seorang warganegara asing, suatu pelanjutan Perintah Perlindungan boleh diberikan hanya bagi maksud menyelesaikan perakaman keterangan di bawah seksyen 52 atau bagi apa-apa keadaan luar biasa sebagaimana yang ditentukan oleh Majistret itu.

Perakaman keterangan orang yang diperdagangkan

52. (1) Pada bila-bila masa semasa tempoh Perintah Perlindungan dibuat di bawah subperenggan 51(3)(a)(ii), jika pendakwaan jenayah telah dimulakan terhadap mana-mana orang bagi suatu kesalahan di bawah Akta ini, pegawai penguat kuasa boleh membuat permohonan lisan bagi pengemukaan orang yang diperdagangkan itu ke hadapan Mahkamah Majistret bagi maksud merakamkan keterangan bersumpah orang yang diperdagangkan itu.

(2) Majistret boleh, atas permohonan itu, mengeluarkan saman atau perintah yang ditujukan kepada orang yang bertanggungjawab ke atas tempat perlindungan di mana orang yang diperdagangkan

Rang Undang-Undang

itu ditempatkan, menghendakinya untuk mengemukakan orang yang diperdagangkan itu pada masa dan di tempat yang dinyatakan dalara saman atau **perintah** itu.

(3) Majistret hendaklah merakamkan keterangan orang yang diperdagangkan itu dan menyelesaikan perakaman itu dalam masa tujuh hari dari tarikh pengemukaan orang yang diperdagangkan itu ke hadapannya.

(4) Semasa perakaman keterangan orang yang diperdagangkan itu, dia hendaklah diperiksa mengikut peruntukan Akta Keterangan 1950.

(5) Majistret hendaklah menyebabkan keterangan yang diambil dijadlkan dalam bentuk bertulis dan, pada akhir tulisan itu, hendaklah menandatangani keterangan itu.

(6) Walau apa pun apa-apa jua yang terkandung dalam Akta ini atau mana-mana undang-undang bertulis lain yang berlawanan, keterangan yang dirakam di bawah seksyen ini hendaklah boleh diterima sebagai keterangan dalam mana-mana prosiding di bawah Akta ini dan berat yang diletakkan pada keterangan itu hendaklah sama sebagaimana seorang saksi yang hadir dan memberi keterangan dalam suatu prosiding.

Permohonan oleh ibu atau bapa, penjaga atau saudara

53. (1) Jika orang yang diperdagangkan yang ditempatkan di tempat perlindungan ialah seorang warganegara atau pemastautin tetap Malaysia, ibu atau bapa, penjaga atau saudara orang itu boleh, pada bila-bila masa, membuat suatu permohonan kepada Mahkamah Majistret untuk meletakkan orang itu ke dalam jagaan ibu atau bapa, penjaga atau saudara orang itu.

(2) Ibu atau bapa, penjaga atau saudara orang yang diperdagangkan itu hendaklah menyerahkan satu salinan permohonan itu kepada Pegawai Pelindung.

(3) Apabila menerima permohonan di bawah subseksyen (2), Pegawai Pelindung hendaklah menyebabkan suatu laporan disediakan berhubung dengan—

- (a) orang yang diperdagangkan itu;
- (b) status apa-apa penyiasatan atau pendakwaan bagi apa-apa kesalahan di bawah Akta ini yang berhubung dengan orang yang diperdagangkan itu;

Antipemerdagangan Orang

- (c) latar belakang orang yang diperdagangkan itu, ibu atau bapa, penjaga atau saudaranya; atau
- (d) apa-apa perkara lain sebagaimana yang Pegawai Pelindung fikirkan berkaitan,

untuk membolehkan Majistret menentukan permohonan demi kepentingan terbaik orang yang diperdagangkan itu.

(4) Majistret hendaklah, apabila menerima permohonan itu, menetapkan tarikh untuk mendengar permohonan itu dan hendaklah dengan notis bertulis, memaklumkan ibu atau bapa, penjaga atau saudara orang yang diperdagangkan itu, mengikut mana-mana yang berkenaan, Pegawai Pelindung atau orang lain yang Majistret fikirkan patut, dan hendaklah menghendaki supaya orang yang diperdagangkan itu hadir ke hadapannya pada tarikh yang ditetapkan.

(5) Selepas mendengar permohonan dan membaca laporan Pegawai Pelindung, dan jika Majistret berpuas hati bahawa adalah demi kepentingan terbaik orang yang diperdagangkan itu, dia boleh—

- (a) meletakkan orang itu ke dalam jagaan dan perlindungan ibu atau bapa, penjaga atau saudara orang itu dengan syarat-syarat yang dia fikirkan perlu untuk dikenakan;
- (b) menghendaki ibu atau bapa, penjaga atau saudara orang itu untuk menandatangani bon; atau
- (c) menghendaki orang itu diletakkan di bawah pengawasan seorang Pegawai Pelindung,

untuk suatu tempoh yang akan ditetapkan oleh Majistret itu.

(6) Majistret boleh, pada bila-bila masa, membatalkan perintah yang dibuat di bawah subseksyen (5).

Pelepasan orang yang diperdagangkan

54. (1) Apabila sesuatu Perintah Perlindungan dibatalkan atau tamatnya tempoh yang dinyatakan dalam sesuatu Perintah Perlindungan, Pegawai Pelindung hendaklah —

- (a) dalam hal orang yang diperdagangkan ialah warganegara atau pemastautin tetap Malaysia, melepaskan orang itu; atau

Rang Undang-Undang

(b) dalam hal orang yang diperdagangkan ialah warganegara asing, melepaskan orang itu kepada pegawai imigresen untuk tindakan yang perlu mengikut peruntukan Akta Imigresen 1959/63.

(2) Pegawai imigresen itu hendaklah mengambil segala langkah yang perlu untuk menguruskan penghantaran balik orang itu ke negara asalnya tanpa kelengahan yang tidak perlu, dengan mengambil kira keselamatannya.

(3) Walau apa pun perenggan (a), mahkamah boleh, atas suatu permohonan yang dibuat oleh Pegawai Pelindung, dan setelah berpuas hati bahawa orang itu memerlukan jagaan dan perlindungan lanjut, membuat perintah supaya orang yang diperdagangkan itu ditempatkan di tempat perlindungan bagi apa-apa tempoh lanjut sebagaimana yang difikirkan patut oleh Majistret.

Orang yang diperdagangkan yang melarikan diri atau dipindahkan dari tempat perlindungan

55. Mana-mana orang yang diperdagangkan yang melarikan diri atau yang dipindahkan dari tempat perlindungan tanpa kuasa sah—

- (a) boleh diambil ke dalam jagaan oleh mana-mana pegawai penguat kuasa dan hendaklah dibawa semula ke tempat perlindungan itu; dan
- (b) hendaklah ditempatkan untuk suatu tempoh yang sama dengan tempoh semasa dia bebas secara tidak sah dan untuk baki tempoh Perintah Perlindungannya yang belum habis yang asalnya dibuat oleh Majistret.

Kesalahan memindahkan atau membantu orang yang diperdagangkan melarikan diri dari tempat perlindungan

56. Mana-mana orang yang —

- (a) memindahkan orang yang diperdagangkan dari tempat perlindungan tanpa kuasa sah;
- (b) dengan diketahuinya membantu atau mendorong,. secara langsung atau tidak langsung, orang yang diperdagangkan untuk melarikan diri dari tempat perlindungan; atau

Antipemerdagangan Orang

- (c) dengan diketahuinya melindungi atau menyembunyikan orang yang diperdagangkan yang telah melarikan diri, atau menghalang orang itu daripada kembali ke tempat perlindungan,

melakukan suatu kesalahan.

Kuasa Menteri untuk memindahkan orang yang diperdagangkan dari satu tempat perlindungan ke tempat perlindungan yang lain

57. Menteri boleh, pada bila-bila masa, atas sebab yang pada hematnya mencukupi, dengan perintah secara bertulis mengarahkan pemindahan mana-mana orang yang diperdagangkan dari suatu tempat perlindungan ke tempat perlindungan yang lain sebagaimana yang dinyatakan dalam perintah itu.

BAHAGIAN VI

PELBAGAI

Sekatan ke atas laporan dan penyiaran media

58. (1) Walau apa pun mana-mana undang-undang bertulis yang berlawanan, apa-apa laporan media massa mengenai—

- (a) apa-apa langkah yang diambil berhubung dengan orang yang diperdagangkan dalam mana-mana presiding sama ada pada peringkat sebelum perbicaraan, perbicaraan atau selepas perbicaraan;
- (b) mana-mana orang yang diperdagangkan yang berkenaan dengannya jagaan atau perlindungan diberikan di bawah Bahagian V; atau
- (c) apa-apa perkara lain di bawah Akta ini,

tidak boleh mendedahkan nama atau alamat, atau memasukkan apa-apa butiran yang dikira boleh membawa kepada pengenalan mana-mana orang yang diperdagangkan yang terlibat sedemikian sama ada sebagai orang yang diperdagangkan atau sebagai seorang saksi dalam mana-mana prosiding.

Rang Undang-Undang

(2) Gambar—

- (a) mana-mana orang yang diperdagangkan dalam mana-mana perkara yang disebut dalam subseksyen (1); atau
- (b) mana-mana orang, tempat atau benda lain yang mungkin membawa kepada pengenalan orang yang diperdagangkan,

tidak boleh disiarkan dalam mana-mana akhbar atau majalah atau disampaikan melalui apa-apa perantara elektronik.

(3) Mana-mana orang yang melanggar subseksyen (1) atau (2) melakukan suatu kesalahan.

Keterangan *agent provocateur* boleh diterima

59. (1) Walau apa pun mana-mana undang-undang atau rukun undang-undang yang berlawanan, dalam mana-mana prosiding terhadap mana-mana orang bagi sesuatu kesalahan di bawah Akta ini, tiada *agent provocateur* boleh dianggap tidak boleh dipercayai semata-mata kerana dia telah cuba melakukan atau bersubahat, atau telah bersubahat atau terlibat dalam konspirasi jenayah untuk melakukan, kesalahan itu jika tujuan utama percubaan, persubahatan atau penglibatan itu ialah untuk mendapatkan keterangan terhadap orang itu.

(2) Walau apa pun mana-mana undang-undang atau rukun undang-undang yang berlawanan, sesuatu sabitan bagi apa-apa kesalahan di bawah Akta ini yang berasaskan semata-mata pada keterangan tanpa sokongan mana-mana *agent provocateur* tidaklah menjadi tidak sah dan tiada sabitan sedemikian boleh diketepikan hanya kerana mahkamah yang membicarakan kes itu telah gagal untuk menyebut dalam alasan penghakimannya keperluan supaya mengingatkan dirinya tentang bahaya membuat sabitan berdasarkan pada keterangan sedemikian.

Kebolehterimaan keterangan dokumentar

60. Jika mana-mana pegawai penguat kuasa telah memperoleh apa-apa dokumen atau keterangan lain dalam menjalankan kuasanya di bawah Akta ini, dokumen atau salinan dokumen itu atau keterangan lain, mengikut mana-mana yang berkenaan,

Antipemerdagangan Orang

hendaklah diterima sebagai keterangan dalam mana-mana prosiding di bawah Akta ini, walau apa pun apa-apa jua yang berlawanan dalam mana-mana undang-undang bertulis.

Kebolehterimaan terjemahan dokumen

61. (1) Jika apa-apa dokumen yang hendak digunakan dalam mana-mana prosiding terhadap mana-mana orang bagi sesuatu kesalahan di bawah Akta ini dalam suatu bahasa selain bahasa kebangsaan atau bahasa Inggeris, terjemahan dokumen itu ke dalam bahasa kebangsaan atau bahasa Inggeris hendaklah diterima sebagai keterangan jika terjemahan itu disertakan dengan perakuan orang yang menterjemahkan dokumen itu yang menyatakan bahawa terjemahan itu ialah terjemahan yang tepat, benar dan betul dan terjemahan itu telah dibuat oleh orang itu atas kehendak mana-mana pegawai penguat kuasa.

(2) Subseksyen (1) hendaklah terpakai bagi sesuatu dokumen yang diterjemahkan, tidak kira sama ada dokumen itu telah dibuat di dalam atau di luar Malaysia, atau sama ada terjemahan itu telah dibuat di dalam atau di luar Malaysia, atau sama ada milikan dokumen itu telah diperolehi oleh mana-mana pegawai penguat kuasa di dalam atau di luar Malaysia.

Tanggung rugi

62. Tiada tindakan, guaman, pendakwaan atau prosiding lain boleh diambil atau dibawa, dimulakan, atau dikekalkan dalam mana-mana mahkamah atau di hadapan mana-mana pihak berkuasa yang lain terhadap —

- (a) mana-mana pegawai penguat kuasa;
- (b) mana-mana Pegawai Pelindung; atau
- (c) mana-mana orang yang bertindak menurut undang-undang dalam mematuhi apa-apa arahan atau perintah seseorang pegawai penguat kuasa atau Pegawai Pelindung,

bagi atau oleh sebab, atau berkenaan dengan, apa-apa perbuatan yang dilakukan atau pernyataan yang dibuat atau ditinggalkan daripada dilakukan atau dibuat, atau yang berupa sebagai dilakukan atau dibuat atau ditinggalkan daripada dilakukan atau dibuat,

Rang Undang-Undang

menurut atau dalam melaksanakan, atau yang diniatkan menurut atau untuk melaksanakan, Akta ini atau mana-mana perintah bertulis, arahan atau benda lain yang dikeluarkan di bawah Akta ini jika perbuatan atau pernyataan itu dilakukan atau dibuat, atau ditinggalkan daripada dilakukan atau dibuat, dengan suci hati.

Penalti am

63. Mana-mana orang yang melakukan suatu kesalahan di bawah Akta ini yang baginya tiada penalti diperuntukkan dengan nyata boleh, apabila disabitkan, didenda tidak melebihi satu ratus lima puluh ribu ringgit atau pemenjaraan selama tempoh tidak melebihi tiga tahun atau kedua-duanya.

Kesalahan oleh pertubuhan perbadanan

64. Jika apa-apa kesalahan terhadap mana-mana peruntukan Akta ini telah dilakukan oleh suatu pertubuhan perbadanan, mana-mana orang yang pada masa pelakuan kesalahan itu ialah seorang pengarah, pengurus, setiausaha atau pegawai lain yang seumpamanya bagi pertubuhan perbadanan itu, atau yang berupa sebagai bertindak dalam mana-mana kapasiti sedemikian, atau telah dalam apa-apa cara bertanggungjawab bagi pengurusan apa-apa hal ehwal pertubuhan perbadanan itu, atau yang membantu dalam pengurusan sedemikian, juga melakukan kesalahan itu melainkan jika dia membuktikan bahawa kesalahan itu telah dilakukan tanpa pengetahuan, persetujuan atau pembiarannya, dan bahawa dia telah menjalankan segala usaha yang wajar dilakukannya untuk mencegah pelakuan kesalahan itu sebagaimana yang dia patut jalankan, dengan mengambil kira jenis fungsinya dalam kapasiti itu dan segala hal keadaan.

Kesalahan oleh pekerja atau ejen

65. Jika mana-mana orang boleh di bawah Akta ini dikenakan hukuman atau penalti bagi apa-apa perbuatan, peninggalan, keabaian atau keingkaran, orang itu bolehlah dikenakan hukuman atau penalti yang sama bagi tiap-tiap perbuatan, peninggalan, keabaian atau keingkaran sedemikian oleh mana-mana pekerja atau ejennya atau ejen pekerja itu, jika perbuatan, peninggalan, keabaian atau keingkaran itu telah dilakukan oleh pekerja orang itu dalam masa

Antipemerdagangan Orang

penggajiannya, atau oleh ejen itu semasa bertindak bagi pihak orang itu, atau oleh pekerja ejen itu dalam masa penggajian pekerja itu oleh ejen itu, atau selainnya bagi pihak ejen itu.

Peraturan-peraturan

66. (1) Menteri boleh membuat peraturan-peraturan yang perlu atau suai manfaat untuk memberikan kuat kuasa penuh, atau bagi menjalankan, peruntukan Akta ini.

(2) Tanpa menjejaskan keluasan subseksyen (1), peraturan-peraturan boleh dibuat —

- (a) untuk menetapkan fungsi atau perkara lain berhubung dengan Majlis;
- (b) untuk mengadakan peruntukan bagi suatu kesalahan, apa-apa perbuatan atau peninggalan yang bertentangan dengan mana-mana peruntukan mana-mana peraturan-peraturan;
- (c) untuk mengadakan peruntukan bagi pengenaan penalti bagi kesalahan itu;
- (d) untuk menetapkan langkah bagi jagaan dan perlindungan orang yang diperdagangkan di tempat perlindungan;
- (e) untuk menetapkan kuasa dan fungsi Pegawai Pelindung;
- (f) untuk mengawal selia pengurusan, pentadbiran dan kawalan tempat perlindungan, termasuk peruntukan bagi kuasa, kewajipan dan fungsi orang yang bertanggungjawab ke atas tempat perlindungan;
- (g) untuk mengadakan peruntukan bagi apa-apa perkara yang, di bawah Akta ini, adalah dikehendaki atau dibenarkan untuk ditetapkan atau yang perlu atau suai manfaat untuk ditetapkan.

Pencegahan anomali

67. (1) Menteri boleh, apabila pada hematnya perlu atau suai manfaat berbuat sedemikian, sama ada bagi maksud menghapuskan kesulitan atau mencegah anomali yang berbangkit daripada pembuatan Akta ini, melalui perintah yang disiarkan dalam *Warta* membuat apa-apa ubah suaian kepada mana-mana peruntukan dalam Akta

Rang Undang-Undang

ini sebagaimana yang difikirkannya patut, tetapi Menteri tidak boleh menjalankan kuasa yang diberikan oleh seksyen ini selepas habis tempoh dua tahun dari tarikh yang ditetapkan.

(2) Dalam seksyen ini, "ubah suaian" termasuklah pindaan, tambahan, pemotongan, penggantian, adaptasi, variasi, pengubahan, dan ketidakpakaian mana-mana peruntukan Akta ini.

HURAIAN

Akta Antipemerdagangan Orang 2007 ("Akta ini"), sebagaimana yang dicadangkan oleh Rang Undang-Undang ini, bertujuan untuk mengadakan peruntukan bagi kesalahan pemerdagangan orang, perlindungan dan bantuan orang yang diperdagangkan, penubuhan Majlis bagi Antipemerdagangan Orang, dan bagi perkara-perkara yang berkaitan dengannya.

Protokol untuk Mencegah, Menghapus dan Menghukum Pemerdagangan Orang, terutamanya Wanita dan Kanak-Kanak, tambahan kepada Konvensyen Bangsa-Bangsa Bersatu terhadap Jenayah Rentas Negara Terancang (UNTOC) ialah asas Rang Undang-Undang ini. Malaysia merupakan Negara pihak kepada UNTOC, tetapi masih belum menyertai Protokol ini.

BAHAGIAN I

2. Babagian 1 Akta ini mengandungi perkara permulaan.
3. *Fasal 1* mengandungi tajuk ringkas dan memberi Menteri kuasa untuk menetapkan tarikh permulaan kuat kuasa Akta ini.
4. *Fasal 2* mengandungi tafsiran beberapa ungkapan yang digunakan dalam Akta ini.
5. *Fasal 3* raemperuntukkan bahawa Akta ini terpakai tidak kira sama ada perbuatan yang memulakan kesalahan pemerdagangan orang berlaku di dalam atau di luar Malaysia dalam keadaan yang dinyatakan dalam *fasal* ini.
6. *Fasal 4* bertujuan untuk meluaskan Akta ini kepada kesalahan luar wilayah.
7. *Fasal 5* memperuntukkan bahawa Akta ini hendaklah dibaca bersama dengan undang-undang bertulis lain dan menjadi tambahan kepada, dan tidak mengurangkan, undang-undang bertulis lain. Sekiranya terdapat apa-apa percanggahan atau ketidakselarasan antara Akta ini dengan mana-mana undang-undang bertulis lain, Akta ini hendaklah mengatasi setakat percanggahan atau ketidakselarasan itu.

Antipemerdagangan Orang

BAHAGIAN II

8. Bahagian II mengandungi peruntukan tentang penubuhan Majlis bagi Antipemerdagangan Orang dan perkara-perkara lain yang berkaitan komposisi, fungsi dan kuasanya.
9. *Fasal 6* memperuntukkan tentang penubuhan Majlis bagi Antipemerdagangan Orang ("Majlis") dan komposisinya. Ketua Setiausaha Kementerian yang bertanggungjawab bagi keselamatan dalam negeri hendaklah menjadi Pengerusinya.
10. *Fasal 7* memperuntukkan bagi fungsi Majlis dan kuasa yang perlu bagi pelaksanaan fungsinya, yang antara lain untuk menyelaraskan dan merumuskan dasar dan program bagi mencegah dan menghapus pemerdagangan orang termasuk program bagi perlindungan orang yang diperdagangkan.
11. *Fasal 8* bertujuan untuk memberikan Menteri kuasa untuk mengeluarkan arahan kepada Majlis mengenai pelaksanaan fungsi dan kuasanya.
12. *Fasal 9* memperuntukkan bagi mesyuarat Majlis. Tujuh anggota hendaklah membentuk kuorum bagi mesyuarat Majlis dan Pengerusi hendaklah mempengerusikan semua mesyuarat. *Fasal* ini juga bertujuan untuk memberikan Majlis kuasa untuk membuat kaedah bagi mengawal selia mesyuarat dan prosidingnya.
13. *Fasal 10* bertujuan untuk membolehkan Majlis menubuhkan jawatankuasa, sebagaimana yang disifatkannya suai manfaat, untuk membantu pelaksanaan fungsinya.
14. *Fasal 11* memperuntukkan bagi pelantikan Setiausaha Majlis dan pegawai-pegawai lain oleh Menteri.

BAHAGIAN III

15. Bahagian III mengandungi peruntukan mengenai pelbagai kesalahan di bawah Akta ini.
16. *Fasal 12* bertujuan untuk mengadakan peruntukan bagi kesalahan pemerdagangan orang bagi maksud eksploitasi. Ia membawa hukuman pemenjaraan bagi tempoh tidak melebihi lima belas tahun, dan boleh juga didenda, apabila disabitkan.
17. *Fasal 13* bertujuan untuk mengadakan peruntukan bagi kesalahan pemerdagangan orang bagi maksud eksploitasi dengan cara ancaman, kekerasan, paksaan, fraud, perdayaan, dsb. Ia membawa hukuman pemenjaraan bagi tempoh tidak kurang dari tiga tahun tetapi tidak melebihi dua puluh tahun, dan boleh juga didenda, apabila disabitkan.
18. *Fasal 14* bertujuan untuk mengadakan peruntukan bagi kesalahan 'pemerdagangan kanak-kanak bagi maksud eksploitasi. Ia membawa hukuman

Rang Undang-Undang

pemenjaraan bagi tempoh tidak kurang daripada tiga tahun tetapi tidak melebihi dua puluh tahun, dan boleh juga didenda, apabila disabitkan.

19. *Fasal 15* bertujuan untuk mengadakan peruntukan bagi kesalahan mendapatkan keuntungan daripada pengeksploitasian orang yang diperdagangkan.

20. *Fasal 16* bertujuan untuk memperuntukkan bahawa kerelaan orang yang diperdagangkan kepada perbuatan pemerdagangan orang adalah tidak relevan.

21. *Fasal 17* bertujuan untuk menjadikan kelakuan seksual lampau orang yang diperdagangkan tidak relevan dan tidak boleh diterima bagi maksud membuktikan bahawa orang yang diperdagangkan itu terlibat dengan kelakuan seksual lain atau untuk membuktikan kecenderungan seksual orang yang diperdagangkan itu.

22. *Fasal 18, 19, 20, 21* dan *22* bertujuan untuk mengadakan peruntukan bagi kesalahan bersampingan.

23. *Fasal 18* memperuntukkan bahawa mana-mana orang yang membuat, memperoleh, memberi, menjual atau memiliki suatu dokumen perjalanan atau pengenalan diri fraud bagi maksud memudahkan suatu perbuatan pemerdagangan orang, melakukan suatu kesalahan.

24. *Fasal 19* memperuntukkan bahawa mana-mana orang yang dengan diketahuinya merekrut orang lain untuk menyertai pelakuan suatu perbuatan pemerdagangan orang, melakukan suatu kesalahan.

25. *Fasal 20* memperuntukkan bahawa mana-mana orang yang menyediakan kemudahan bagi maksud melakukan kesalahan di bawah Akta ini, melakukan suatu kesalahan.

26. *Fasal 21* memperuntukkan bahawa mana-mana orang yang mengadakan perkhidmatan atau kemudahan kewangan, dengan mengetahui atau mempunyai alasan yang munasabah untuk mempercayai bahawa perkhidmatan atau kemudahan itu akan digunakan untuk membantu pelakuan suatu perbuatan pemerdagangan orang, melakukan suatu kesalahan.

27. *Fasal 22* menjadikan suatu kesalahan untuk melindungi mana-mana orang yang telah melakukan, atau sedang merancang, atau mungkin melakukan, suatu perbuatan pemerdagangan orang.

28. *Fasal 23* mengenakan suatu kewajipan ke atas pemunya, operator atau nakhoda mana-mana pengangkut untuk memastikan bahawa orang yang menaiki pengangkut memiliki dokumen perjalanan bagi kemasukan sah orang itu ke dalam negara penerima.

29. *Fasal 24* bertujuan untuk menjadikan suatu kesalahan bagi mana-mana orang yang secara sengaja tidak memberi apa-apa maklumat yang berhubungan dengan kesalahan di bawah Akta ini.

30. *Fasal 25* bertujuan untuk mengadakan peruntukan bagi kekebalan daripada pendakwaan jenayah kepada orang yang diperdagangkan berkenaan

Antipemerdagangan Orang

dengan kemasukannya secara haram, tempoh pemastautinan yang tidak sah dan pemilikan dokumen perjalanan atau pengenalan diri fraud.

31. *Fasal 26* bertujuan untuk mengadakan peruntukan bagi perlindungan pemberi maklumat.

BAHAGIAN IV

32. Bahagian IV mengandungi peruntukan yang berhubungan dengan penguatkuasaan Akta ini.

33. *Fasal 27* bertujuan untuk mengenal pasti pegawai penguat kuasa bagi maksud menjalankan kuasa penguatkuasaan di bawah Akta ini. Setiap pegawai penguat kuasa hendaklah mengisytiharkan jawatannya dan hendaklah mengemukakan kad kuasa yang dikeluarkan kepadanya semasa bertindak di bawah Akta **ini**.

34. *Fasal 28* bertujuan untuk memberikan kuasa penyiasatan kepada pegawai penguat kuasa. Di bawah *fasal 29*, seseorang pegawai penguat kuasa diberikan kuasa untuk menangkap tanpa waran mana-mana orang yang didapati melakukan atau cuba melakukan suatu kesalahan di bawah Akta ini. Dia juga diberi kuasa untuk menjalankan penggeledahan dan penyitaan dengan waran di bawah *fasal 30*, dan penggeledahan dan penyitaan tanpa waran di bawah *fasal 31*.

35. *Fasal 32* bertujuan untuk membolehkan seseorang pegawai penguat kuasa untuk mempunyai capaian kepada data berkomputer.

36. *Fasal 33* bertujuan untuk mengenakan kewajiban ke atas pegawai penguat kuasa untuk menyediakan senarai barang yang disita.

37. *Fasal 34* bertujuan untuk memperuntukkan bahawa pegawai penguat kuasa boleh memeriksa mana-mana orang yang mengetahui fakta dan hal keadaan sesuatu kes dan mengemukakan ke hadapannya apa-apa harta alih, rekod, laporan atau dokumen atau memberinya pernyataan bertulis yang dibuat dengan bersumpah yang menyatakan apa-apa maklumat sebagaimana yang dikehendakinya. *Fasal 35* memperkatakan hal keadaan yang pernyataan itu boleh diterima semasa perbicaraan.

38. *Fasal 36* bertujuan untuk memperuntukkan bahawa barang yang disita semasa penyiasatan boleh dilucuthakkan oleh mahkamah pada akhir perbicaraan mana-mana orang yang dipertuduh atas suatu kesalahan di bawah Akta ini. Jika tiada pendakwaan, *fasal* ini menyatakan tatacara bagi mahkamah untuk menentukan sama ada barang yang disita dilucuthakkan atau dilepaskan kepada orang yang berhak kepadanya.

39. *Fasal 37* bertujuan untuk memperuntukkan bahawa kos memegang apa-apa barang yang disita di bawah Akta ini hendaklah didapatkan sebagai hutang sivil yang kena dibayar kepada Kerajaan daripada orang yang daripadanya apa-apa barang disita.

Rang Undang-Undang

40. *Fasal 38* bertujuan untuk memperuntukkan bahawa tiada kos atau ganti rugi yang berbangkit daripada penyitaan apa-apa barang pada menjalankan mana-mana kuasa di bawah Akta ini boleh didapatkan melainkan jika penyitaan itu dibuat tanpa sebab yang munasabah.
41. *Fasal 39* bertujuan untuk menjadikannya suatu kesalahan bagi mana-mana orang yang menghalang mana-mana pegawai penguat kuasa dalam melaksanakan fungsinya di bawah Akta ini.
42. *Fasal 40* bertujuan untuk mengadakan peruntukan bagi kesalahan menzahirkan kepada mana-mana orang lain maklumat yang mungkin menjejaskan suatu penyiasatan di bawah Akta ini.
43. *Fasal 41* bertujuan untuk memperuntukkan bahawa tiada pendakwaan bagi suatu kesalahan di bawah Akta ini boleh dimulakan tanpa keizinan bertulis Pendakwa Raya.

BAHAGIAN V

44. Bahagian V mengandungi peruntukan bagi jagaan dan perlindungan orang yang diperdagangkan.
45. *Fasal 42* bertujuan untuk memberi Menteri kuasa untuk mengisytiharkan mana-mana rumah, bangunan atau tempat sebagai tempat perlindungan bagi jagaan dan perlindungan orang yang diperdagangkan. Dia juga boleh mengarahkan pengasingan kategori berlainan orang yang diperdagangkan.
46. *Fasal 43* bertujuan untuk mengadakan peruntukan bagi pelantikan Pegawai Pelindung bagi maksud, antara lain, kawalan ke atas dan tanggungjawab bagi jagaan dan perlindungan orang yang diperdagangkan di tempat perlindungan.
47. *Fasal 44* bertujuan untuk memberi pegawai penguat kuasa kuasa untuk mengambil ke dalam jagaan sementara mana-mana orang atas syak yang munasabah bahawa dia adalah orang yang diperdagangkan dan mengemukakannya ke hadapan Majistret dalam masa dua puluh empat jam bagi maksud memperoleh perintah perlindungan interim. Perintah perlindungan interim membenarkan orang yang diambil ke dalam jagaan sementara itu untuk ditempatkan di tempat perlindungan selama tempoh empat belas hari bagi maksud menjalankan penyiasatan dan siasatan.
48. *Fasal 45* bertujuan untuk memperuntukkan bahawa pegawai penguat kuasa boleh membawa mana-mana orang yang diambil ke dalam jagaan semmentaranya, jika dia berpendapat bahawa orang itu memerlukan pemeriksaan atau rawatan perubatan, daripada membawanya kepada Majistret, membawanya kepada pegawai perubatan.
49. *Fasal 46* bertujuan untuk mengadakan peruntukan bagi kewajipan pegawai perubatan apabila mana-mana orang dibawa kepadanya di bawah *fasal 45*.
50. *Fasal 47* bertujuan untuk memberikan kuasa kepada pegawai penguat kuasa untuk membenarkan kemasukan ke hospital mana-mana kanak-kanak yang diambil ke dalam jagaan sementara.

Antipemerdagangan Orang

51. *Fasal 48* bertujuan untuk mengenakan ke atas pegawai penguat kuasa tanggungjawab bagi keselamatan dan perlindungan jika mana-mana orang diambil ke dalam jagaan sementara dimasukkan ke hospital.

52. *Fasal 49* bertujuan untuk memperuntukkan bahawa seseorang yang diambil ke dalam jagaan sementara dan dibawa kepada pegawai perubatan bagi pemeriksaan perubatan hendaklah dikemukakan ke hadapan Majistret dalam masa dua puluh empat jam apabila selesainya pemeriksaan atau rawatan, atau dimasukkan ke hospital, mengikut mana-mana yang berkenaan.

53. *Fasal 50* bertujuan untuk melepaskan pegawai penguat kuasa, pegawai perubatan dan semua orang yang bertindak dalam membantu pegawai perubatan, daripada apa-apa liabiliti di sisi undang-undang.

54. *Fasal 51* bertujuan untuk memperuntukkan bahawa, selepas perintah perlindungan interim diperoleh di bawah *subfasal 44(2)*, pegawai penguat kuasa hendaklah menyiasat ke dalam hal keadaan kes seseorang sementara Pegawai Pelindung hendaklah siasat latar belakangnya, dan laporan disediakan kepada Majistret untuk menentukan sama ada orang itu adalah orang yang diperdagangkan. Jika Majistret berpuas hati bahawa orang itu adalah orang yang diperdagangkan, Majistret boleh, jika orang yang diperdagangkan ialah seorang warganegara atau pemastautin tetap Malaysia, membuat Perintah Perlindungan memerintahkan orang yang diperdagangkan itu ditempatkan di tempat perlindungan selama tempoh tidak melebihi dua tahun, atau jika dia ialah seorang warganegara asing, memerintahkan orang itu ditempatkan di tempat perlindungan, selama tempoh tidak melebihi tiga bulan, bagi maksud perakaman keterangan bersumpah dan selepas itu melepaskannya kepada pegawai imigresen untuk menguruskan penghantaran balik ke negara asalnya. Perintah Perlindungan boleh dilanjutkan atau dibatalkan atas permohonan pegawai penguat kuasa atau Pegawai Pelindung.

55. *Fasal 52* bertujuan untuk mengadakan peruntukan bagi perakaman keterangan bersumpah orang yang diperdagangkan ke hadapan Majistret, jika pendakwaan jenayah telah dimulakan terhadap mana-mana orang bagi kesalahan di bawah Akta ini, dan keterangan itu hendaklah boleh diterima di mahkamah. Majistret hendaklah menyelesaikan perakaman keterangan orang yang diperdagangkan dalam masa tujuh hari dari tarikh pengemukaan orang yang diperdagangkan itu ke hadapannya.

56. *Fasal 53* bertujuan untuk menyatakan tatacara bagi ibu atau bapa, penjaga atau saudara orang yang diperdagangkan yang merupakan seorang warganegara atau pemastautin tetap Malaysia ditempatkan di tempat perlindungan, boleh memohon kepada mahkamah untuk menyerahkan orang yang diperdagangkan itu kepada jagaan dan perlindungan ibu atau bapa, penjaga atau saudara.

57. *Fasal 54* bertujuan untuk memperuntukkan bahawa apabila pembatalan sesuatu Perintah Perlindungan atau tamatnya tempoh yang dinyatakan di dalamnya, orang yang diperdagangkan, jika dia ialah warganegara atau pemastautin tetap Malaysia, hendaklah dilepaskan, atau jika dia ialah warganegara asing, hendaklah dilepaskan kepada pegawai imigresen untuk menguruskan penghantaran balik ke negara asalnya tanpa kelengahan yang tidak perlu.

Rang Undang-Undang

58. *Fasal 55* bertujuan untuk memperuntukkan bahawa mana-mana orang yang diperdagangkan yang melarikan diri atau dipindahkan dari tempat perlindungan tanpa kuasa sah boleh diambil ke dalam jagaan dan dibawa semula ke tempat perlindungan.

59. *Fasal 56* bertujuan untuk menjadikan suatu kesalahan bagi mana-mana orang yang menindahkan atau membantu orang yang diperdagangkan untuk melarikan diri dari tempat perlindungan tanpa kuasa sah.

60. *Fasal 57* bertujuan untuk memberi Menteri kuasa untuk mengarahkan pemindahan mana-mana orang yang diperdagangkan dari satu tempat perlindungan ke tempat perlindungan yang lain.

BAHAGIAN VI

61. Bahagian VI mengandungi peruntukan yang berhubungan dengan perkara pelbagai.

62. *Fasal 58* bertujuan untuk melarang mana-mana laporan media massa daripada mendedahkan nama, alamat atau apa-apa butiran yang boleh membawa kepada pengenalan mana-mana orang yang diperdagangkan. Begitu juga, gambar mana-mana orang yang diperdagangkan tidak boleh disiarkan dalam mana-mana akhbar atau majalah atau dihantar melalui apa-apa perantara elektronik.

63. *Fasal 59* bertujuan untuk menjadikan keterangan *agent provocateur* boleh diterima.

64. *Fasal 60* bertujuan untuk mengadakan peruntukan bagi kebolehterimaan keterangan dokumentar yang diperoleh oleh mana-mana pegawai penguat kuasa pada menjalankan kuasanya di bawah Akta ini.

65. *Fasal 61* bertujuan untuk mengadakan peruntukan bagi terjemahan dokumen dalam bahasa selain bahasa kebangsaan atau bahasa Inggeris hendaklah boleh diterima dalam mana-mana prosiding.

66. *Fasal 62* bertujuan untuk memperuntukkan bahawa tiada apa-apa tindakan boleh diambil terhadap mana-mana pegawai penguat kuasa, Pegawai Pelindung atau mana-mana orang yang bertindak menurut undang-undang dalam mematuhi apa-apa arahan pegawai penguat kuasa atau Pegawai Pelindung, bagi apa-apa perbuatan atau peninggalan, jika perbuatan atau peninggalan itu dilakukan dengan suci hati.

67. *Fasal 63* bertujuan untuk memperuntukkan suatu penalti am bagi kesalahan-kesalahan yang tiada penalti diperuntukkan dengan nyata.

68. *Fasal 64* bertujuan untuk menjadikan pengarah, pengurus, setiausaha atau pegawai lain yang seumpamanya yang bertindak dalam kapasiti sedemikian atau orang yang bertanggungjawab dalam pengurusan hal ehwal pertubuhan perbadanan itu atau membantu dalam pengurusannya, bertanggungjawab bagi

Antipemerdagangan Orang

kesalahan oleh entiti perbadanan itu melainkan jika kesalahan itu telah dilakukan tanpa pengetahuan, persetujuan atau pembiarannya, atau dia telah mengambil langkah berjaga-jaga dan telah menjalankan segala usaha yang wajar untuk mencegah pelakuan kesalahan itu.

69. *Fasal 65* bertujuan untuk memperuntukkan bahawa setiap orang adalah bertanggung secara sama bagi apa-apa perbuatan, peninggalan, keabaian atau keingkaran pekerja atau ejennya, jika perbuatan, peninggalan, keabaian atau keingkaran itu telah dilakukan dalam masa penggajiannya atau agensinya.

70. *Fasal 66* bertujuan untuk memberi Menteri kuasa untuk membuat peraturan-peraturan sebagaimana yang perlu bagi memberikan kuat kuasa penuh atau bagi melaksanakan peruntukan Akta ini berkenaan dengan perkara-perkara yang dinyatakan di dalamnya.

71. *Fasal 67* memberi Menteri kuasa untuk membuat ubah suaiari kepada mana-mana peruntukan Akta ini dalam masa dua tahun permulaan kuat kuasanya bagi maksud menghapuskan kesulitan atau mencegah anomali yang berbangkit daripada pembuatan Akta ini.

IMPLIKASI KEWANGAN

Rang Undang-Undang ini akan melibatkan Kerajaan dalam perbelanjaan wang tambahan yang amaunnya belum dapat ditentukan sekarang ini.

[PN(U²)2573]